



和
2346
卷 2/5

記言卷之三十一 內篇

經說序

老人平生篤好古書說讀五十年耄老多忘
失百不記一載籍既多臨事不能遍觀作經
說一十一篇雖不備然於古人之旨其大略
可舉矣一言易易統易義卦義圖書統論為
四篇二言春秋三言詩四言書五言洪範六
言禮禮統禮志為二篇七言樂樂義樂術樂
變原樂樂通為五篇八言刑九言政政術政
制為二篇十言時令十一言鬼神凡二十篇



易春秋虞夏殷周之書夏小正月令齊魯之
語具在此特老人記誦之末業而已也眉叟
序

進經說序

教寓於言道寓於事學數此者也德得此者
也古群聖人之書盡矣愚昏妄意古人自幼
始學之年勤力古聖人賢人之書今過八十
年歲月魯鈍學不通道不成耄荒忘失十九
雖甚老悖發憤忘寢食追述經旨著成說十
一衍說九共二十篇一萬二千九十六字皆

出於虞夏殷周古經夏小正月令齊魯語左
國氏此特記誦之末業然古人之旨大略畢
舉庶幾有補於治道之萬一云

上即位之三年首春節大匡輔國崇祿大夫議
政府右議政兼領 經筵事監春秋館事臣
許穆拜手稽首以

上

經說序終

經說目錄

易說一

易統
卦義

易義
圖書統論

春秋說二

詩說三

書說四

洪範說五

禮說六

禮統

禮志

樂說七

樂義
原樂

樂術
樂通

樂變

刑說八

政說九

政術

政制

時令說十

鬼神說十一

經說目錄終

經說

易說一 易統

易者隨時變易以從道者也天理人事在焉其
時用之大一卦一時六十四爻一時三百八
十四而至四千九十六時引而伸之觸類而長
之其至微者體也其至顯者用也自其顯者而
言之萬事萬物變易無常吉凶終始其用也自
其微者而言之無形無朕先萬化而無始後萬
化而無終不息不已其體也太極之本也
有萬本於太極太極者無極之名分而為六十



四散而為三百八十四極而至四千九十六百
千萬變而時其時則一而已

先天下而開物後天下而成務極其數而定天
下之象示天下之吉凶六十四卦之體三百八
十四爻之用至大至廣至神其已形已見者可
以言知其未形未見者不可以名求時其時不
索其義則不通索其義不明其用則無變

卦有才爻有變以之行鬼神而無窮者也古經
二其一乾坤天地之道陰陽之本氣化之始也
坎離陰陽之成質者也其二咸恒夫婦之道生

育之本形化之始也未濟坎離之合既濟坎離
之交合而交生物之成功者也

盛矣哉水火者天地之大用也

易之教更三聖人而成包犧氏始畫八卦文王
作彖孔子作十翼推言道德仁義之教時世之
變古今之異也此程傳所以作也

八卦卜筮之大宗也上古有八索夏曰歸藏殷
曰連山周曰易歸藏首坤連山首艮易首乾易
變易之義也歸藏連山後世無傳焉

易說二 易義

上古包羲氏受河圖始畫八卦河圖者聖人之
瑞也河圖之文五十五衍母小衍之數也大
衍之數五十著數五十虛其一其用四十九八
變而成八卦十六變而成六十四卦虛五與十
太極也奇數二十偶數二十兩儀也一九老陽
二七少陽四六老陰三八少陰二陽二陰四象
也一與六合二與七合三與八合四與九合陽
中有陰陰中有陽一生一成五行迭用相生相
克比和相從八卦之所以作也先天八卦自然
之位也後天八卦流行之妙也四象相交八卦

相盪成卦六十四以開物成務盡天下之變者
也八卦既重六位時序往而復來綿綿不已消
長之義也易變易之名也數往者順知來者逆
易逆數者也其策萬一千五百有二十卦有彖
爻有辭大象六十四小象三百八十四皆所以
明吉凶也禎祥妖孽感於物恠見於卦爻卦爻
者吉凶之兆鬼神之用也明者察於幾微見於
不見滿而知戒安而知懼知戒則不傾知懼則
不危傾者覆之輒危者亡之途卜筮者所以存
戒懼而守正慮患而作者也故曰易者其衰世

之意也

易說三 卦義

天道無言而垂象聖人設卦而示教象與教一也易之道變易無常神乎萬物而不遺妙乎萬事而不失大而冒天下之道而不窮一而二二而四四而八八而十六十六而三十二三十二而六十四加一倍而成易陰陽分四象均八卦成重而為六位有卦序有卦德有卦才有卦時有卦變吉凶消長之用寓於卦爻著於彖象斯其至矣易之道備矣

天地之生物成物之義直義直則理正理正則言順言順則可以與人言可以問鬼神故曰人謀鬼謀龜筮協從義不直則理不正言不順而龜筮共違而况於人乎而况於鬼神乎易之義使為善者勸為惡者懼故曰君子修之吉小人恃之凶

易說四 圖書統論

易曰天一地二天三地四天五地六天七地八天九地十天一生水地六成之地二生火天七成之天三生木地八成之地四生金天九成之

天五生土地十成之天地之數始於一成於五
極於十五衍母十衍子一得五六二得五七三
得五八四得五九五得五十一三五七九陽也
二四六八十陰也一陰一陽迭生迭成一與九
老陽四與六老陰二與七少陽三與八少陰陰
中有陽陽中有陰老陰變少陽少陽成老陽老
陽變少陰少陰成老陰九退於八八極於六六
進於七七極於九
老陰六二四之積也老陽九一三五之積也六
進於九九退於六消長之義也

一六北三八東二七南四九西水一次木次火
次土次金相生之序也

河圖圓圓者生成之合洛書方方者奇偶之分
奇者天之數偶者地之數一統六三統八二連
七四連九奇正而偶偏尊卑之位也一三五無
變七八九變者一生一成陽極則變也

北東陽之始南西陽之極也極則變也水一次
火次金次木二西南四東南六西北八東北相
克之序也

河圖自一至九二十五自二至十三十

洛書自一至九亦二十五自二至八二十河圖
主常地數極於十而天數不足洛書主變天數
極於九而地數不足洛書不言十然一與九交
二與八交三與七交四與六交而十在其中圖
書一正一變迭為經緯縱橫十五一消一長鬼
神行焉

天地之數五十五小衍之數也虛五則五十
大衍之數也又虛其一其用四十九虛者實之
源也

虛五與十大極也天數二十地數二十兩儀也

一六二七三八四九四象也九四三八一六二
七八卦也先天後天八卦相易以立本而致用
也

春秋說

周德衰正道缺諸侯縱恣天下大亂於是孔子
作春秋孔子曰春秋天子之事也知我者其唯
春秋乎罪我者其唯春秋乎孔子不得位傳堯
舜文武周公之道其大經大法載於春秋春秋
文成數萬其指數千萬物之散聚載焉其中弑
君亡國諸侯奔走不得保社稷者皆失仁義之

道者也君人者失仁義之道而子弑其父者有
之臣弑其君者有之春秋者修仁義明人道之
大倫褒有德黜有罪儀表天下貶天子退諸侯
討大夫王事達矣故君不君則犯臣不臣則誅
孟子曰王者之跡息而詩亡詩亡然後春秋作
春秋作而亂臣賊子懼其大義尊君卑臣貴仁
義賤詐力嚴中國攘夷狄其權度或抑或揚或
與或奪或進或退或微或顯非上智不能知其
言考諸三王而不謬建諸天地而不悖質諸鬼
神而無疑百世以俟聖人而不惑故曰春秋者

聖人之用禮義之大宗也游夏之徒不能贊一
辭而孔子謂顏淵曰行夏之時乘殷之輅服周
之冕樂則韶舞放鄭聲遠佞人四代禮樂之治
大略如此其治之之術明王道辨人紀善善惡
惡存亡國繼絕世補弊起廢長於治春秋之教
也仁義之不修人道不立天道不成地道不平
於是寒暑失其序日月薄食旱乾水溢星孛星
隕地震山崩此皆人為感之也聖人悉書之百
代之教也君子懼焉春秋自隱公元年春王三
月公及邾儀父盟于蔑至哀公十有四年春西

狩獲麟其間二百四十二年嗚呼春秋作於隱公傷天下之無復有王也絕筆於獲麟觀於天道之不違也聖人制作成文而麟至其際深矣

詩說

詩言志情動於中而形於言詩有六義一曰風二曰賦三曰比四曰興五曰雅六曰頌風者風也風而動物感人心而成教化者也雅者正也定上下通權好一天下者也雅有大小有燕享朝會受釐之異焉頌者容也容德著切以享上帝先王郊禘之樂歌也故曰正得失動天地感

鬼神莫近於詩王道衰禮義亂而變風變雅作太史公曰詩記山川谿谷鳥獸草木牝牡雌雄故長於風

周南召南聖人之風王化之基也孔子曰關雎樂而不淫哀而不傷其無以加矣序以為麟趾關雎之應騶虞鵲巢之應而見王道之成也故孔子曰人而不為周南召南其猶正牆面而立也歟有以也夫

風出於里巷歌謠之作雅頌朝廷郊廟之樂而二雅之變亦出於賢人君子憂時慨世之作也

其忠厚惻怛聖人取焉

故論詩本之性情達之聲音先王有以厚人倫重禮義使讀之者感發其良心懲創其逸志風雅正變一也

成王尊魯宋之後比之三恪故其詩巡守不陳不列於太師之職故魯宋無風

邶鄘衛之地紂之古地其人怠惰其聲淫靡使人慢弛而邪僻為變風之首故樂記曰鄭衛之音亂世之音也此之慢桑間濮上之音亡國之音也其政散誣上行私而不可止也

鄭聲淫故孔子論為邦曰放鄭聲

正風其地周之東都洛邑是也自平王徙居東都王室遂卑與諸侯同其風里巷之音不列於二雅

齊太公望之所封也太公四嶽之後通工商逐魚鹽之利人物歸之齊地富強近利故孔子曰齊一變而至魯

魏舜禹之所都其俗好儉約有聖賢之遺風晉獻公滅而并之故魏風多晉詩

唐堯之故都其俗儉而有禮有堯之遺風至子

變號為晉國三晉稱多人傑之士

秦本伯益之後禹賜姓嬴氏在西戎之地自秦仲始有車馬禮樂至襄公逐犬戎并有岐豐之地其俗尚強悍故其風車隣駟鐵小戎終南無衣皆好誇金革之事

陳伏羲氏之墟有虞氏之後有虞闕父者周武王以為神明之後封之陳與黃帝帝堯之後共為三恪武王以太姬妻其子禘太姬好巫覡歌舞之事其俗化之如宛丘東門之扮是也

商虞夏之際后稷封於邠後世失其官至公劉

復修后稷之業大於商周公述后稷公劉之化作商詩以戒成王

宵雅隸三不德私惠文王孫子本支百世二雅之正也正月之憂桑柔之悲閔二雅之變也駟有駮泮水閔宮之頌禱亦三十五頌之變也

吳公子札觀於周樂為之歌周南召南曰羨哉始基之矣猶未也然勤而不怨為之歌王曰思而不懼其東周乎為之歌鄭曰其細也甚民其不堪其先亡乎為之歌齊曰泱泱乎大風也表東海者其太公乎為之歌魏曰大而約儉而易

行以德輔此則明主也為之歌唐曰思深哉其
有陶唐氏遺民乎為之歌秦曰夏聲大之至也
其周之舊乎為之歌陳曰國無主其能久乎為
之歌蘓曰美哉蕩乎樂而不淫周公之東乎
為之歌小雅曰思而不貳怨而不言其周德之
衰乎猶有先王之遺民焉為之歌大雅曰廣哉
熙熙乎其文王之德乎為之歌頌曰至矣哉五
聲和八風平節有度守有序盛德之所同也皆
論聲察之時政者也孔子曰詩可以觀若公子
札豈審音而已亦可謂善於觀詩者也已矣

詩上明三綱下達五常徵存亡辨得失小人
歌之以貢其俗君子賦之以見其志聖人採
之以觀其變

盾蒼所傳為齊詩韓嬰所傳為韓詩

毛萇注詩鄭玄箋詩曰毛鄭詩齊轅固生治
詩齊人宗之魯申公治詩魯人宗之謂之齊
魯詩

書說

尚書者上古之書也太史公曰書記先王之事
長於政

虞夏之書堯舜禹之事也禹臯陶益稷之謨君
臣相戒之訓也定四時齊七政所以授民時也
為之巡守朝覲修五禮同律度量衡

教有五典禮有三禮樂有五聲八音其典刑五
流五宅三居五刑五服三就又官刑教刑贖刑
三臯陶曰宥過無大刑故無小有德五服五章
有罪五刑五用

洛十二救命九官司空百揆稷播垂工益若上
下草木鳥獸龍納言帝曰朕聖讒說殄行

堯有九年之水鯀不績禹乃嗣興修鯀之功暨

益奏庶鮮食決九川濬畎澮暨稷播麥庶艱食
懋遷有無化居弼成五服至于五千州十有二
師外薄四海

禹繼舜其命禹之言曰人心惟危道心惟微惟
精惟一允執厥中

乃文命敷于四海曰德惟善政政在養民水火
金木土穀惟修正德利用厚生惟和
九功惟叙九叙惟歌

所畏巧言令色孔壬所識庶頑讒說
禹貢九州之志也土壤貢賦苞匭金石齒革守

龜皮服卉服聚於此

洪範九疇洛書之叙也禹治洪水而洛書出武王克殷而箕子傳洪範

商誓周誓桀紂之虐也仲虺之誥曰東征西夷怨南征北狄怨天下歸商也武成曰東征綏厥士女篚厥玄黃昭我周王克受殷命也

太甲密邇先王其訓阿衡其忠也大誥不敢閉天降威用周公其勞也佑我烈祖格于皇天說訓王也彤有雉雉武丁之修也大雷以風天道動威三叔也

恭承民命永地于新邑盤庚之遷也敬天之休作周匹休成洛邑也

天降威我民大亂喪德亦莫非惟酒小大邦用喪亦莫非惟酒誥妹邦也殷之三宗治民祗懼不敢侮鰥寡享國長久後王逸豫耽樂而不長無逸之戒也犬馬非其土性不畜珍禽奇獸不畜於國西旅貢獒太保之戒也

太康不返五子咸怨作歌曰訓有之內作色荒外作禽荒甘酒嗜飲峻宇彫墻有一於此未或不亡

紂之亡微子謀於箕子比干箕子曰商其淪喪
我罔為臣僕王子不出我乃顛隄又曰自靖人
自獻于先王孔子曰殷有三仁焉

顧命康王之誥正終正始者也夏殷無徵立政
周官成周之憲也五辟疑赦周道衰甫刑之末
失也

秦誓繆公敗於晉悔過作誓君子曰三代之末
胤征西伯戡黎秦誓一也然秦人既敗於殷繼
而有彭衙之後特徒悔耳故春秋以戎狄待秦
西伯既戡黎祖伊諫紂之不悛見周德日盛也

秦人不用王命專師討伐再伐而不止周
卒亡於秦秦人作誓知天下亂矣聖人序書修
春秋其意一也

繆公廣地蓋國遠霸西戎至孝公用商鞅之
法國益強而天下卑秦至昭襄王周亡於秦
三世至始皇用李斯謀并天下斯學荀卿之
術不師古而專用法術持世卒焚滅詩書坑
殺文學始皇死而諸侯並起而亡秦

洪範說

昔夏后氏治洪水洛有神龜負文而出其文九

夏后氏因之以叙九疇箕子陳洪範以衍之天道陰陽下民相協其居彞倫之所以叙也天有金木水火土穀之運以行造化人有貌言視聽思慮之則以成德性食以養之貨以資之祀以報本司空治土司徒治教司寇治禁賓有禮師有威有以服遠人有以除殘暴歲月日星辰曆數之紀定四時授民時皇極之蕩蕩平平正直剛柔三德之治龜筮之考疑歲月日時休咎之徵壽富康寧好德正命五福之常凶短折疾憂貧惡弱六極之變九疇之序也皇極者王者之

則至極之名也本之以五行敬之以五事厚之以八政協之以五紀皇極之所以建也又之以三德明之以考疑驗之以庶徵勸之以五福威之以六極皇極之所以行也初一五行次二五事次三八政次四五紀所以立極之體也次六三德次七稽疑次八庶徵次九福極所以行極之用也皇極居五處至尊摠萬類立極之位者也皇建極則五氣順五事修八政成五紀協撫世理物威福不失鬼神不違歲月日時無易福極類應皇極者九疇之樞也

漢興除秦法招學士稍求亡書亦十不二三
濟南伏生年九十餘口授經文才二十餘篇
孝景時孔子壁經諸書出孔氏藏虞夏殷周
之書及傳論語孝經皆科斗文字尚書增多
伏生二十五篇所謂古文是也錯亂摩滅不
可知者尚多藏之書府

孔安國家藏蝌斗尚書以今文易之

劉歆得古文謂之古文尚書

禮說一 禮統

禮者天理之節文人事之儀則道德仁義教民

正俗君臣上下父子兄弟尊師親友及夫禋祀
朝覲聘享征伐冠婚燕射學校之教凡民彛物
則非禮不立其行之於身視聽言動恭敬擗節
升降拜揖儀則之常以至凶喪哭踊之變所以
修身制行嚴等威定親疎別同異決嫌疑明是
非皆主於禮經禮三百威儀三千鄙夫野人莫
不知敬三尺童子莫不知畏蓋其出於性而非
強也天秩天叙之不可亂也如是故曰家國天
下禮治則治禮亂則亂禮亡則亡其教也自小
學洒掃應對之節以至聖人無聲無臭之極禮

出於天而成於聖人者也禮貴隨時故三代不同禮古今之宜風氣之殊禮所以變也其天尊地卑上下之位聚類群居五品之常三代之所不變也

禮說二 禮志

古昔聖王制禮世有損益至周大備為經禮三百威儀三千周衰典籍浸壞孔子時已不具至秦大壞漢興稍求亡書高堂生傳士禮十七記百三十一明堂陰陽三十三玉史氏二十曲臺后倉九明堂陰陽說五周官六周官傳五內則

古經弟子職出於管子檀弓學記大學孔氏之遺書而中庸成於子思古經出於魯淹中及孔氏小儀曲禮卜戴記之賈誼作保傅傳記禮大槩漢儒補之其大者邦國之禮十王朝之禮十七禮始於冠本於昏重於喪祭尊於朝聘和於燕射此禮之大體也今因士禮十七記四十九周官三百分類次序冠昏喪祭燕聘飲射養老士相見之禮總十禮冠禮十一教責成人之道也昏禮十三教敬慎重正也喪禮八十皆送死之重節也祭禮四十教敬享不辱也燕禮七明

君臣和上下也聘禮十二相厲以禮也飲禮四
教貴禮而賤貨也射禮一習禮樂二觀德行也
養老四周官外饗五帝憲三王乞言教孝也士
相見禮九所以重其身而慎其文也共百有八
十名曰禮志

樂說五篇

樂義

古者聖王以天產作陰德制之以中禮以地產
作陽德節之以和樂此禮樂之本而合天地之
化者也

周禮六司樂以六律六同五聲八音六舞大合
樂以致鬼神示以和邦國以諧萬民以安賓客
以悅遠人以作動物

奏黃鐘歌大呂舞雲門以祀上帝奏大蕤歌應
鐘舞咸池以祭地示奏姑洗歌南呂舞大磬以
祀四望奏蕤賓歌林鐘舞大夏以祭山川奏夷
則歌小呂舞大濩以享姜嫄奏無射歌夾鐘舞
大武以享先王先公樂六變而川澤山林丘陵
墳衍原隰羽毛鱗介蠕動百物四靈之知天地
之神畢致於是魚鮪不涖鳥不言而獸不狘人

情不失

凡樂六變而天神降八變而地示出九變而人鬼格

陽聲曰律陰聲曰同黃鐘大簇姑洗蕤賓夷則無射陽聲也大呂應鐘南呂林鐘小呂夾鐘陰聲也

五聲者曰宮曰商曰角曰徵曰羽合陰陽之聲文之以五聲播之以八音八音者土曰埴竹曰管皮曰鼓匏曰笙絲曰絃石曰磬金曰鐘木曰祝敔法易之八卦者也埴為坎音管為艮音鼓

為震音絃為離音鐘為兌音祝敔為乾音祝敔者樂之始終者也

恐笙為巽音磬為坤音見漏

舞有帔舞有羽舞有皇舞有旄舞有干舞有人舞諸侯燕射用弓矢舞

眾仲曰羽天子用八諸侯用六大夫四士二夫舞所以節八音而行八風故自八以下

凡樂事以鐘鼓奏九夏曰王夏曰肆夏曰納夏曰章夏曰齊夏曰族夏曰祓夏曰騶夏

恐昭夏見漏

王宮諸侯卿大夫士有懸有軒有判懸有特懸行趨環拜車射皆有節

樂術

樂有六德六語六詩六舞六律德中和祇肅孝友語興道諷誦言語詩風賦比興雅頌德為本而律為音也

德者性之端也樂者德之事也金石絲竹樂之器也詩言其志也歌詠其事也舞動其容也三者本於心和氣從之樂不可以為偽

君子獨樂其志而不厭其道備舉其道而不私其欲是故情見而義立樂終而道尊君子以好善小人以聽過故生民之道樂為大

樂之隆非極音也清廟之瑟朱絃而疏越一唱而三嘆有遺音者先王之樂將以教民平好惡而反人道之正也

樂在宗廟之中君臣上下敬在鄉黨之中長幼順在閨門之內父子兄弟親和合父子君臣親附萬民此先王立樂之方也

樂記曰天地順而四時當民有德而五穀昌疾疹不作而無妖祥聖人為之父子君臣以立紀綱定天下正六律和五聲絃歌詩誦此之謂德音德音之謂樂也故先王之樂使親踈貴賤長

幼男女之理皆形見於樂故樂觀其深矣

樂變

記曰雅頌之聲皆發於辭本於情故君臣以睦父子以親韶夏之樂也聲浸乎金石潤乎草木怨思之聲不淫則悲事不本乎道德不可為儀言不合乎先王不可為道音不合乎雅頌不可為樂也

鄭衛之音亂世之音也比之慢桑間濮上之音亡國之音也其政散誣上行私而不可止也土殺則草木不長水煩則魚鼈不大氣衰則生

物不遂世亂則禮廢而樂淫是故其聲哀而不莊樂而不安慢易而犯節流湎而忘本大則容姦小則思欲

姦聲感人者逆氣應之逆氣成象而淫樂興焉正聲感人者順氣應之順氣成象而和樂興焉故哀心感者其聲嗷而殺樂心感者其聲嗶而緩喜心感者其聲發而散怒心感者其聲粗而厲敬心感者其聲直而廉愛心感者其聲和而柔

音之起由人心生人心之動物使之然感於物

而動故形於聲聲成文故治世之音安而樂其
政和亂世之音怨而怒其政乖亡國之音哀而
思其民困故聲音與政通矣故曰審其聲而知
其音審其音而知其樂審其樂而知其政
先王之樂所以節百事也聲有五節遲速本末
以相及故樂得中聲聲成五以降五降之後不
容彈矣於是煩手淫聲惱人心耳乃忘平和
鄭衛之聲也君子不聽也物亦如之百事無節
至於煩乃舍煩不舍則生疾君子之近琴瑟以
儀節也非以怡心也

鄭音好濫淫志宋音燕女溺志衛音趨數煩志
齊音敖辟驕志此四者皆淫於色而害於德祭
祀不用也

周景王鑄鍾而擲伶州鳩曰天子省風以作樂
小者不窕大者不擲則和於物物和則嘉成心
億則樂窕則不感擲則不容心是以感感實生
疾今鐘擲矣王心不堪其以心疾死

季札觀於周樂曰鄭音細民不堪其先亡乎陳
音淫國無主其不久乎見舞韶濩曰聖人之弘
也猶有慙德適晉將宿於戚聞鐘聲曰異哉辯

而不德必加於戮夫子獲罪於君以在此猶燕
子巢於幕上遂去之孫文子懼終身不聽琴瑟
孔子學琴於師襄既得其數既得其志畢然高
望而遠眺焉曰丘追得其為人矣黜然而黑頽
然而長曠如望羊奄有天下非文王其孰能為
此師襄曰君子聖人也其傳曰文王操
師曠曰吾驟歌北風又歌南風南風不競多死
聲楚必無功故周禮太師有大師執同律以聽
軍聲而詔吉凶

原樂

古者朱襄氏之世多風而陽氣畜積萬物解散
草木不成作五絃之琴以求陰氣以定群生葛
天之樂三人摻牛尾投足以歌八闋載民玄鳥
遂草木奮五穀敬天常遠帝功依地德總萬物
之極軒轅氏立伶倫伐竹於嶰谿之谷以為黃
鐘之宮適有鳳凰鳴于阮隃以別十有二律黃
鐘之宮律呂之本鑄十有二鐘五音既和以中
春之月乙卯之日日在奎始奏曰咸池
顓頊氏立有音若熙熙淒淒鏘鏘龍龍效八風
之音命曰承雲帝嚳之世咸黑歌九招六列六

英雋作擊鼓鐘磬壎箎

陶唐氏之始陰多滯伏湛積水道壅塞民氣鬱
闕作為舞以宣道之作大章以祀上帝夔擊石
拊石百獸率舞

舜命質修九招六列六英其典曰簫韶九成鳳
凰來儀

禹道九河陂九澤道九州臯陶作夏籥九

成湯放桀代虐以寬伊尹作大濩武王克商弛
攻鈇橐而周公作武

成王立周公克殷之叛民歐犀象而作大象樂

之所由来尚矣

周禮曰以六同之和辨天地四方陰陽之聲以
為樂器凡聲高聲砢正聲緩下聲肆陂聲散險
聲斂達聲羸微聲簡回聲衍侈聲笄弁聲鬱薄
聲甄厚聲石

聖人之政降人以心降心以樂所謂非金石絲
竹之謂也謂人樂其家人樂其族人樂其業人
樂其都邑人樂其政令人樂其道德如此君人
者作樂以節之使不失其和也

是故清明象天廣六象地終始象四時周旋象

風雨五色成文八風從律百度得數大小相成
終始相生樂行而移風易俗天下皆寧執鼓控
揭控揭堦祝敵堦堦德音之音也和以鐘磬竽瑟舞以
干戚旄狄以之祭先王之廟以之獻酬醕酢以
之官序貴賤各得其宜以之示後有尊卑長幼
之序也

君子反情以和其志比類以成其行發之以聲
音文之以琴瑟動之以干戚飾之以羽旄從之
以蕭管奮至德之光動四氣之和以著萬物之
理也

樂通

伶州鳩曰樂器重者從細輕者從大是以琴瑟
尚宮鐘尚羽石尚角匏竹制利草木一聲夫政
象樂樂從和和從平聲以和樂律以平聲金石
以動之絲竹以行之詩以道之歌以詠之匏以
宣之瓦以贊之革木以節之物得其常曰樂極
極之所集曰聲聲應相保曰和細大不踰曰平
如是而鑄之金磨之石繫之絲木越之匏竹節
之鼓而行之以遂八風於是乎氣無滯陰亦無
散陽陰陽序風雨時嘉生繁祉人民和利物備

而樂成上下不罷故曰樂正
夫有和平之聲於是乎道之以中德詠之以中
音德音不愆以合神人

太史公曰使人聞宮音則溫叙而廣大聞商音
則方正而好義聞角音則惻隱而愛人聞徵音
則樂善而好施聞羽音則整齊而好禮

記曰宮為君商為臣角為民徵為事羽為物宮
亂則其君驕其音荒商亂則其官壞其音跛角
亂則其民怨其音憂徵亂則其事勤其音哀羽
亂則其財匱其音危如此國之滅亡無日矣

太史公曰古之明王舉樂非以娛心快意恣欲
將以為治也故正教者皆始於樂樂正而心正
爾雅曰宮謂之重商謂之敏角謂之經徵謂之
迭羽謂之抑

大瑟謂之灑大琴謂之離大鼓謂之鼗小者謂
之應大磬謂之馨大笙謂之巢小者謂之和大
篪謂之沂大埙謂之噐大鐘謂之鏞其中謂之
剽小者謂之棧大簫謂之言小者謂之箛大箛謂之產
謂之箛其中謂之篴小者謂之箛大箛謂之產
其中謂之仲小者謂之箛

鼗音貢馨音噐噐音
叫篴乃結反箛音聃

徒鼓謂之步徒吹謂之和徒歌謂之謠徒擊鼓
謂之嘒徒鼓鐘謂之修徒鼓磬謂之蹇所以鼓
祝謂之止所以鼓敵謂之甄大鼗謂之麻小者
謂之鞀和樂謂之節
荀子曰聲樂之象鼓大麗鐘統實磬廉判竽笙
簫和管籥發猛墳箎翁博瑟易良琴婦好歌清
盡舞天道無鼓其樂之君耶
故鼓似天鐘似地磬似水竽管籥似星辰日月
鞀祝拊控揭似萬物

刑說

禮以教之政以齊之刑以一之刑亦末也雖然
上古之治非制刑無以止亂禁暴故黃帝克蚩
尤顓頊伐九黎舜流四凶
舜命皋陶曰蠻夷猾夏寇賊姦宄汝作士五刑
有服五服三就五流有宅五宅三居惟明克允
其典曰象以典刑流宥五刑鞭作官刑扑作教
刑金作贖刑又曰宥過無大刑故無小
甫刑曰庶威奪貨亂法之極也故曰明清于單
辭毋或私家于獄之兩辭獄貨非寶惟府辜功
報以庶尤然立五辟之贖贖金千鍰無死刑穆

王遊行財匱之末弊也

周官司寇之治制五刑以糾萬民以圜土教罷民以嘉石平罷民以肺石達窮民以明刑恥之其改者罪有上有中下有為三年二年一年之不齒其不能改者殺之

以五聲聽獄訟而求其情以三刺三宥三赦斷庶民獄訟之中施之以上服下服

有邦汙邦賊邦謀犯邦令矯邦令為邦盜邦朋邦誣之刑罰

附刑罰有議親議故議賢議能議功議貴議勤

議賓之辟

刑新國用輕典刑平國用中典刑亂國用重典罰世輕世重世治則其罰輕世亂則其罰重故唐虞之際四凶流春秋之末少正卯誅罰有經有權

先王議事制刑作法不預法預則爭民乃棄禮而徵於法

夏后氏政衰作禹刑殷之衰作湯刑周末作九刑衰國之治也故曰亡國多刑

紂殘虐之治而其亡也獄囚自出王者之治以

不殺為德然陵夷無禁亡國之道也

舜宥過無大固聖人之仁也至於刑故無小不可謂不嚴

湯代虐以寬然湯之誓曰不從誓言孥戮汝罔有攸赦

盤庚之誥曰有顛越不恭暫遇姦宄我乃劓殄滅之無遺育無俾易種于茲新邑

周人作五刑之辟各五百斷死刑亦五百寇賊劫略攘奪矯虔作奇技奇器偽行澤非假於鬼神凡疑衆亂俗者皆論死王者之治戒無殘虐

而已未有為國不嚴而國不亂者也

周室微弱陵夷至於戰國荀卿申不害韓非之徒主刑名為深刻語至公孫鞅始名為法太史公曰法家嚴而少恩名家苛察繳繞使人不得返意而專決於名失人之情者也

秦用法術國富強而兼天下卒以亡國絕世子孫無噍類而天下莫哀也此不可不察也

政說一 政術

虞典曰德惟善政政在養民水火金木土穀惟修正德利用厚生惟和九功惟叙九叙惟歌

臯陶戒禹曰毋曠庶官天工人其代之
古者天子立常伯常任準人虎賁綴衣夷微盧
烝諸侯有司徒司馬亞旅不以檢人嚴師丕式
飭庶言庶獄庶慎以享天心莫不以克俊有德
而興亦莫不以蓋刑庶習而亡

陶唐氏曆象日月星辰敬授人時有虞氏齊七
政修五禮明五刑以弼五典為之巡守朝覲敷
奏以言明試以功車服以庸命九官咨十二牧
三載考績三考黜陟幽明曰惇德允元而難壬
人

箕子叙九疇三八政食貨祀司空司徒司寇賓
師

周官六卿分職太宰掌邦治司徒掌邦教宗伯
掌邦禮司馬掌邦政司寇掌邦禁司空掌邦土
以唱九牧阜成兆民明王立政不惟其官惟其
人曰不惟反以公滅私

語聖人論故事詳矣曰行夏之時乘殷之輅服
周之冕樂則韶舞放鄭聲遠佞人鄭聲淫佞人
殆

為政在人取人以身修身以道修道以仁仁者

言言卷之三十一
人也親親為大義者宜也尊賢為大親親之殺尊賢之等禮所生也

凡為天下國家有九經曰修身也尊賢也親親也敬大臣也體群臣也子庶民也來百工也柔遠人也懷諸侯也

臨民以莊則敬孝慈則忠舉善教不能則勸故曰作新民

寬則得衆信則民任焉敏則有功公則悅故曰為政以先而民畏服

政刑之使民遠罪不如德禮之民日遷善而不

自知故曰能以禮讓為國乎何有不能以禮讓為國如禮何為政以先不令而行上好禮則民莫敢不敬上好義則民莫敢不服上好信則民莫敢不用情夫如是則四方之民襁負其子而至矣所重民食喪祭故周書曰重民五教惟食喪祭

敬事而信節用而愛人使民以時無欲速無見少利欲速則不達見少利則大事不成不教而殺謂之虐不戒視成謂之賊慢令致期謂之暴猶之與人也出納之吝謂之有司

洪範曰凡厥庶民無有謠朋人無有比德惟皇
作極無偏無僮王道蕩蕩無僮無偏王道平平
無反無側王道正直無虐罔獨而畏高明
天之與人一也天之降戾祥在德人道亂而謫
見於上聖人懼焉

齊景公問政孔子對曰君君臣臣父父子子故
曰名不正則言不順言不順則事不成事不成
則禮樂不興禮樂不興則刑罰不中刑罰不中
則民無所措手足

太僕之命曰慎簡乃僚無以巧言令色便僻側

媚故語曰惡紫之奪朱也惡鄭聲之亂雅樂也
惡利口之覆邦家者

政者正也正人之不正者也天道福善禍淫罪
人黜伏易曰無號咷終有凶小人窮極無用號
咷而終有凶也

昔軒轅氏克蚩尤顓頊氏伐九黎虞舜氏誅四
凶而天下服周道衰王政息亂臣賊子接跡於
世聖人憂之假魯史作春秋其書褒有德黜有
罪闢邪說正人心春秋者撥亂反正之書也孟
子曰王者之跡息而詩亡詩亡然後春秋作春

秋作而亂臣賊子懼

政說二 政制

周官司馬掌邦政以佐玉平邦國是曰政官制
軍萬有二千五百人為軍王六軍大國三軍次
國二軍小國一軍二千五百人為師師有帥五
百人為旅旅有帥百人為卒卒有長二十五人
為兩兩有司馬五人為伍伍有長周官軍將命
卿師帥中大夫旅帥下大夫卒長
上士兩司馬中士

制畿封國設儀辨位進賢興功建牧立監制軍
詰禁施貢分職簡稽鄉民均守平則比小事大

制邦國之賦上地食者三之二用民家三人中

地食者半用民二家五人下地食者三之一用

民家二人食者三之二息田一食者三
之息田二薄田所息者多

邦千里曰國畿其外侯甸男采衛蠻夷鎮蕃為

九畿各五百里一方五千里四方萬里禹貢甸
侯綏要荒各五百里四方五千

里禹貢聲教所及盡海內其疆理止
五限周漢盡海內之地而疆畫之也

中春教振旅遂以蒐田以祭社中夏教芟舍遂

以苗田以享初中秋教治兵遂以獮田以祀祊

中冬教大閱遂以狩田以享蒸制九伐馮弱犯

寡者眚之賊賢害民者伐之暴內陵外者壇之

野荒民散者削之負固不服者侵之賊殺其親

者正之放弒其君者殘之犯令陵政者杜之內

外亂禽獸行者滅之馮凌也音瘦也四面削其地也壇讀如禪置之空壇

出其君立其次賢者杜之杜塞之使不得與隣國交通也

師大合軍行禁令以救無辜伐有罪

大師司馬掌其戒令泣卜涖釁主軍器及戰巡

陳軫事賞罰遷廟之主反社主在軍者殺牲以血塗主軍器

師有功左執律右執鉞以先愷樂獻功于社師

不功以厭奉主車相王吊勞士庶子厭喪冠也奉送也軍

敗則以喪禮送主歸之於廟與社也厭於葉反

大役待汶而誅賞會同掌其政令大射合諸侯

六耦大祭羞魚牲大喪平士大夫一其服喪祭

詔馬牲六耦王三侯以諸侯為六耦馬牲王喪之以馬祭者蓋遣奠也送之至墓告而

藏之也

王制山川神祇有不舉者為不敬不敬者君削

以地宗廟有不順者為不孝不孝者君絀以爵

變禮易樂為不從不從者君流革制度衣服者

為畔畔者君討

軍志曰有虞氏戒於國體命也夏后氏誓於軍

正德也殷人出軍而誓義也周人將戰而誓力

也

時令說

上古風氣未開人文未著黃帝氏始占斗建察於天時神而化之使民不倦帝嚳氏能序星辰以著衆陶唐氏曆象日月星辰驗之以四方日永日短星辰之運行民人鳥獸之變易定四時之叙虞夏氏撫于五辰以成庶切

虞夏之際遠矣殷人以歲月日星辰曆數以紀天時以授民時周人正歲年以序事辨十有二歲十有二月十有二辰十日二十八星之位以

會天位四時氣至天子親率三公九卿諸侯大夫以方玉實柴迎氣於四郊返而聽時令春布德和令夏發爵行慶秋選士厲兵冬賞死事恤孤寡順天之行也

初陽義也禘陽之盛也蒸陰義也嘗陰之盛也饗禘有樂食嘗無樂春饗孤子秋食耆老陰陽之義也

元辰天子為籍千畝諸侯百畝古者令藏種子后宮以其有傳類蕃孳之祥也生而獻之以佐王共郊禘也

春分朝日秋分夕月於是日夜中同度量平權
衡正鈞石

獺獻魚虞人入澤梁豺祭獸田獵鳩化為鷹頒
羽物設罝羅

啓蟄而郊龍見而雩玄鳥至社玄鳥至立郊媒
會男女

日在吐陸而藏冰日在西陸朝覲而出冰以節
陰陽之盛衰四時灾孽不作民無天札之殃
方春盛德在木安萌芽養孤幼省囹圄去桎梏
毋覆巢毋殺胎天牲孕不食掩骼埋胔

凡養老飲養陽氣也用之春夏食養陰氣也用
之秋冬

春夏以樂舞教國子秋冬頒學合樂殷人春夏
學干戈秋冬學羽籥

春月不可以稱兵稱兵者必天殃興戎不可從
我始也

二月萬物皆動九月玄鳥蟄熊羆貉鼯鼯穴
三月出火九月納火行火令也四時易火救時
疾也春秋變其水火化土也

三月薦鞠衣以祈蚕事四月世婦獻繭布于三

宮夫人世婦之吉者使繅以為黼黻文章四月天子始締八月黼裘九月獻功裘秋省而蜡蜡而羅襦

五月天子薦黍庶人薦麥七月農乃登穀先薦寢廟九月薦稻五穀不時果實未熟人不得食市不得鬻

夏日至日南影短而極極則氣至於是致日辨四時之叙致地示物魁以檜凶荒喪札冬至陰陽爭后不省方商旅不行閉關息民掩身齋戒以待其所定

四月決小罪出輕繫七月修法制嚴斷刑秋田祭百神報成萬物也儺除過時之陽也天子之禮也

申嚴號令塞阱杜獲謹蓋箴巡積聚命無不務內助天地之閉箴也蟄虫坏戶促民收斂勸種麥無失時昆虫未蟄不以火田草木黃落然後入山林

四月致役乎神不可以興土功不可以合諸侯不可以起兵動衆以搖養氣以妨神農之事八月可以興土功可以合諸侯可以起兵動衆凡

舉大事毋逆大數必順其時慎因其類然後可
以易關市可以納貨賄百事乃遂凡有不修謫
見於妖孽

郊大報天而主日禮行於郊而百神受職風雨
節寒暑時社祭土而主陰氣禮行於社而百貨
可極焉

春朝夏宗秋覲冬遇陳治道試民功天子五年
一巡守考時月正日同律度禮樂法制觀民風
察好惡治德除慝無有僭差上下通而教化達
矣君臣之際有天地之義焉郊祀朝諸侯其義

一也

季冬之日經虛危大儺旁磔以禳災厲

斗柄在丑出土牛以送寒氣令告民出五種具
田器合族人大飲於太寢命樂師大合吹而罍
凡在天下九州之民咸獻其力以共郊廟百神
之祀

是月也日窮于次月窮于紀星回于天數將幾
終歲且更始天子飭周典論時令以待來歲之
宜頒朔告邦國

大哉聖人之用也天地無為而化行聖人無貳

而化成故聖人能與天地參天地之跡在物聖人之跡在事考其事而求其心可以盡物可以事天

鬼神說

記言鬼神之德視之而不見聽之而不聞體物而不可遺齊朋盛服以承祭祀洋洋乎如其上如在其左方

天地變化其至著至速者謂之鬼神禱之則應祈之則獲無聲無形而其昭昭者不可欺也

天曰神日月星辰皆是也地曰示山河草木皆

是也人曰鬼皆一氣也人者鬼神之會也生則死死歸于土其氣發揚于上為昭明焄蒿悽愴此神之著也精氣交感有以畏百家有以服萬民炳蕭灌鬯合鬼與神教之至也

泰壇祭天也泰圻祭地也泰昭祭時也祖迎祭寒暑也王宮祭日也夜明祭月也幽宗祭星辰也雩宗祭水旱也山林川澤丘陵能出雲氣為風雨見怪物皆神也凡有神皆有祭八蜡之報四方百神之靈先畝水庸皆有享

立廟禘壇墀天子七廟一壇一墀諸侯五廟一

壇一墀大夫三廟二壇適士二廟一壇官師一廟天子祭五殤諸侯祭三殤大夫祭二殤士與庶人祭其子而止

郊禘天子之禮也有天下者祭百神諸侯在其地則祭亡其地則不祭天子立泰社諸侯立侯社大夫置社凡生死出入起居飲食皆有祀天子七祀司命中雷國門國行泰厲戶竈諸侯五祠司命中雷國門國行公厲大夫三祀族厲門行適士二祀門行士與庶人祭竈則不祭戶有法施於世則祀有功德於民則祀能禦大穢

則祀以死勤事則祀以勞定國則祀死而無所歸曰厲能以禍福食於人者妖也

冬寒夏暑春發秋收鬼神之正也

山之怪曰夔魍魎水之怪曰龍罔象土之怪曰羆羊皆氣之乖戾所生者也

人有不得其死者其氣不散為妖為怪有寃而死者其氣亦不散

內史過曰鬼神聰明正直而壹者也依人而行世治則人心正而禍福不亂為善者得福為惡者得禍詩曰愷悌君子神明所勞世亂則禍福

反施而民不知所從於是民相率而聽於神鬼神不散非類淫祀無福反召妖孽妖孽不在鬼神在人人心正則鬼神亦正

昔少皞氏衰九黎亂德殺伐積寃家為巫史民瀆詛盟以至民神雜糅裁害存臻顓頊氏受之以南正重司天北正黎司地司天屬神司地屬民令無相侵瀆也

堯有降水人禽鬼神之居相混重黎氏率修舊典以正神人之治

禹導川決水九山刊旅象物鑄鼎姦恠畢見以

護神人之居

禡之亡有神降于辛禡人享神請命史噐曰國將興聽於民將亡聽於神禡其亡矣

秦之亡有巨狄鬼神之妖涼德成哉

聖人之治莫先於明祀典正人心善惡昭明民知所從從民而治無告無蓋鬼神大順寒暑時風雨調五穀穰熟黎民壽考富樂君蒿妖誕不得亂於人

記言卷之三十一終

記言卷之三十二 外篇

東事一

檀君世家

上古九夷之初有桓因氏桓因生神市始教生
民之治民歸之神市生檀君居檀樹下號曰檀
君始有國號曰朝鮮朝鮮者東表日出之名或
曰鮮汕也其國有汕水故曰朝鮮都平壤陶唐
氏立一十五年檀君氏生夫妻或曰解夫妻母
非西岬女也禹平水土會諸侯於塗山夫妻朝
禹於塗山氏後檀君氏徙居唐巖至商武丁八

言言卷之三十一
年檀君氏歿松壤西有檀君塚松壤今江東縣或曰檀君入阿斯達不言其所終泰伯阿斯達皆有檀君祠

夫妻立為北扶餘夫妻禱於鯤淵得金蛙以貌類金蛙命曰金蛙夫妻之世商亡箕子至朝鮮後周德衰孔子欲居九夷

夫妻卒金蛙嗣徙迦葉原為東扶餘金蛙末秦并天下秦亡人入東界為秦韓漢高后時衛滿據朝鮮朝鮮侯淮南奔至金馬為馬韓孝武時略歲貊歲君南閭降初置滄海郡用丞相弘計

罷之

金蛙傳帶素帶素恃其強大與句麗爭攻伐卒為所擊殺其弟曷思代立至孫都頭降句麗東扶餘亡曷思非王名都曷思一說曰曷思考其年代在莽之世桓因神市之世無所攷檀君之治自陶唐氏二十五年歷虞夏氏至商武丁八年千四十八年解夫妻之後至曷思亡於莽之世亦千年亦有餘種通於晉

金蛙悅優淳水之女優淳澤名在秦伯山南感日影照身生朱蒙朱蒙少子曰溫祚檀君氏之後有解夫

婁解夫妻之後有金蛙金蛙之後有朱蒙溫祚
為句麗百濟之祖皆本於檀君氏

扶餘在玄菟北千餘里南與鮮卑接北至弱水
地方二千里有城邑宮室土宜五種其人好勇
強有會同揖讓之禮類中國出使者衣錦罽以
金銀飾其腰其法殺人者死沒入其家盜一責
十二男女淫婦人妬者皆殺之有軍事殺牛以
祭天用其蹄占吉凶蹄解者凶合者吉死而葬
有擲無棺殉用生人居喪男女皆衣純白其地
出善馬貂貂羨珠其國殷富其王印文曰穢王

之印其國古穢貊之域晉武帝時通貢中國太
康六年為慕容廆所襲破其王依慮自殺其子
弟走保沃沮帝以東夷校尉鮮于嬰不救責免
嬰以何龕代之後年其嗣立王依羅詣龕乞援
帝遣督郵賈沉擊破廆衆依羅得復國後廆侵
掠扶餘人口賣於中國帝詔發官物贖還下司
冀二州禁市

肅慎氏一名挹婁在不咸山北東濱大海西接
寇漫汗北至弱水居深山之地車馬不通夏則
巢居冬則穴處父子世為君長無文字以言語

約束無牛羊畜豬食肉衣皮織毛為布有卻常
肅慎木名中國有聖王代立則生其皮可衣作瓦鬲
受四五升以為食坐則箕踞無鹽鐵燒木作灰
灌取汁食之男女皆編髮作布襜尺餘以拵前
後夫貞女淫貴壯賤老死則以死之日葬之中
野交木為槨殺豬積其上以為送死嗜凶悍以
無憂哀相尚父母死者男子不哭以為壯士相
盜者無多少皆殺之有石砮皮骨之甲檀弓三
尺五寸楛矢尺有咫其國東北出石砮其利入
鐵國人取之必先禱鬼神周武王時貢楛矢石

砮及周公旦輔成王遣使入賀魏景元末貢楛
矢石砮弓甲貂皮物魏以錦罽帛傳雞賜其
王晉武帝時復入貢元帝時貢石砮至成帝時
朝石晉曰候牛馬西向眠者三年矣是以知大
國所在云

箕子世家

箕子殷之宗室也封於箕子爵故曰箕子或曰
名胥餘為殷太師帝乙有嫡子受資辯捷疾好
勇力其庶兄微子啓恪慎克孝箕子勸帝乙曰
啓賢且長可立為嗣帝乙不聽卒立受受立為

君號為紂思以威服天下能百戰百克伐有蘇
氏取妲己以歸所言皆從初紂始為象箸箕子
嘆曰彼為象箸必不羹藜藿盛以土簋遠方珍
恠輿馮宮室之漸自此作矣紂厚賦稅宮室臺
榭陂池侈服為長夜之飲懼以失日問左右皆
不知也乃使問箕子箕子私嘆曰為天下主而
一國皆失日天下其危矣一國皆不知而我獨
知之吾其危矣辭以醉而不知紂殘虐百姓為
炮烙之刑灸炙諫輔天下叛之周德日盛微子
謀於箕子比干曰商今其淪喪若涉大川其無

津涯將若之何箕子曰商其淪喪我不為臣僕
告王子出迪我言刻子不出不免殷之祀絕矣
自靖人自獻于先王我不顧行遯微子抱祭器
而逃箕子諫紂紂不聽或曰可以去矣箕子曰
不可為人臣諫不聽而去是彰其君之惡而自
悅於民也吾不忍為也乃被髮佯狂為奴紂囚
之鼓琴以自傷後人謂之箕子操比干諫而不
去紂殺之周武王既平殷亂釋箕子之囚就箕
子而問之曰殷亡何也箕子不答武王曰惟天
陰隲下民相協其居我不知彘倫攸叙箕子乃

陳洪範九疇述天人之大法敷言皇極之訓凡三十有七章載之周書箕子乃去之至朝鮮殷民從之者五千餘人詩書禮樂巫醫卜筮之流百工技藝皆從焉武王因以封之而不臣也都平壤古有檀君朝鮮謂之箕子朝鮮始至言語不通譯以通其志因教之以禮義農蚕織作畫為經界行助法立八條之約相殺者償以命相傷者償以穀相盜者男沒為奴女沒為婢欲贖者人五十萬雖免為民俗猶羞之嫁娶無所售風俗無盜門不夜扃行旅野宿婦人貞信不淫

器用俎豆崇信禮讓不尚兵鬪傍國化之箕子朝周過故殷墟宮室毀壞生禾黍箕子作麥秀之歌曰麥秀漸漸兮禾黍油油彼狡童兮不與我好兮殷民間之皆流涕箕子之子孫相傳至周之末世燕伯稱為王東略地朝鮮侯欲興兵伐燕以尊周室大夫禮諫而止使西說燕王約兩國毋相侵伐也六國時燕略屬真番朝鮮置吏築塞後朝鮮侯亦稱為王浸驕逸燕攻其西地二千餘里以滿潘汗為界及秦并天下使將軍蒙恬築長城至遼東為外徼朝鮮王否大懼

遂服焉否卒太子準立秦滅燕趙之民多亡入
朝鮮漢興盧縮王燕與朝鮮約以沮水為界復
守遼東故塞及縮入匈奴燕人衛滿亡命魁結
蠻夷服聚眾千餘東渡沮水求居西界請為藩
蔽王準拜為博士封百里地令守西鄙滿招納
亡人其眾益盛迺詒準曰漢兵大至請入衛仍
襲王準王準戰敗南奔滿遂據朝鮮自箕子傳
國四十一世凡九百二十八年王準失國涉海
至金馬自稱馬韓王統小國五十後世百濟王
溫祚二十六年并馬韓之地箕氏絕不祀自王

準據馬韓又二百年而亡前後凡一千一百二
十年箕子氏子孫分散為奇氏韓氏鮮于氏今
平壤兔山有箕子塚國人立崇仁殿血食不絕
也

當殷之亡微子去之箕子佯狂為奴比干諫而
死孔子曰殷有三仁焉東國被箕子之化門不
夜扁婦人貞信不淫治教長久國祚不絕千有
餘年此三代之所未有也

衛滿世家

衛滿者燕人燕王綰時滿亡命聚儻千餘東走

出塞渡沮水時朝鮮王準立會天下大亂燕齊
趙流民多歸西界滿請為臣以為扞蔽王準拜
為博士封百里之地令守西鄙滿并有古秦雲
障地招納亡人浸強大及孝惠高后時天下已
定滿詒王準曰漢兵大至請入衛仍襲王準王
準兵敗南奔滿遂據朝鮮都王險是為衛滿朝
鮮滿與遼東太守約為外臣保塞外諸蠻夷無
使入寇入貢者無得禁止因以兵威財物服屬
旁小國地方數千里傳二世至孫右渠驕逸不
修職貢真番辰國上書請入見天子又壅遏不

通孝武遣使譙讓右渠右渠不肯奉詔發兵攻
殺奉使者何元封三年大出兵討右渠尼溪相
參遣人殺王右渠降漢衛氏絕祀無後也事在
朝鮮列傳分其地為樂浪臨屯玄菟真番四郡
滿未有積仁行德徒以亡人因天下亂聚黨千
餘初以小弱乞臣僕於朝鮮既驟強以詐逐王
準奪之國而并之不義甚矣因以兵威財物略
屬傍國地方數千里然二世而滅亡天道暴得
者暴亡何以傳世久長與檀君箕子並哉

四郡 二府

漢孝武時既平右渠置四郡樂浪郡治朝鮮縣
臨屯郡治東曉縣玄菟郡治沃沮真番郡治雲
縣

孝昭時罷真番郡築遼東玄菟城後更置二府
以朝鮮舊地平郡玄菟為平州以臨屯樂浪為
東府皆置都督府

三韓 馬韓

馬韓羅人謂之西韓西韓風俗其人散居山海
間各有帥長曰臣智曰邑借無城郭居處土室
草屋上出戶用纓珠飾髮垂耳帛袍草躡不貴

金銀錦罽性勇悍謹呼善用弓楯矛櫓好鬼神
五月耕種既畢羣聚歌舞以祭鬼神至十月農
事畢亦如之國邑各立一人主祭天神曰為天
君別置邑立大木懸鈴鼓之曰蘇塗嚴事如西
域之事佛者馬韓王準略屬傍小國如美襄大
小石索諸夷五十餘國大國萬家小國數千家
晉武帝時入貢至太熙元年詣東夷校尉何龕
獻土物咸熙三年入朝其明年請內附

辰韓

辰韓本秦亡人來居亦曰秦韓不能自立馬韓

置君而附於馬韓其地宜五穀饒蚕桑織縑嫁娶有禮俗男女有別行者讓路

弁韓

弁韓樂浪之苗裔也附於秦韓七辰狗邪丹奚不斯弁樂奴諸夷屬二韓者各十二國大國家四五千小國六七百又屬邑各有渠帥曰臣智曰險側曰樊濊曰殺奚曰邑借三韓屬國七十八國見於陳壽三國志東史不傳

漢書曰玄菟樂浪箕子所封也

後漢書曰弁韓與辰韓雜居其衣服居處言語風俗相類

唐書曰弁韓在樂浪之地平壤古樂浪郡玄菟古朝鮮地沮水西北七百里臨屯葦貊之國東眡為葦國沃沮在樂浪東古肅慎氏之國也

記言卷之三十三終

記言東事序

神市檀君之世當帝嚳唐虞之際君臣肇有人
民希少朴蒙睢盱無文字可述至箕子治朝鮮
始有俎豆禮俗之治自衛滿三韓以降攻戰不
休亡滅既多載籍不備既無文獻可徵後世雜
出於傳記者實多扶婁朱蒙赫居世溫祚之世
傳道古事而已上自檀君下至新羅末世大國
六附庸諸小國十餘九域初無君長自神市始
教生民之治至檀君始建國立號作檀君世家
箕子治朝鮮立八政之教作箕子世家肅慎氏

周公旦輔成王貢楛矢石砮作肅慎氏列傳衛
滿本亡人據朝鮮并古秦雲障地以兵威財物
拓地千餘里作衛滿世家扶餘本解扶婁之地
出善馬貂豹羨珠入貢於晉作扶餘列傳王準
逐於衛滿立國馬韓并國五十傳二百年秦韓
弁韓各有君長三韓屬國七十八作三韓列傳
新羅朴昔金三姓相承千餘年有德之治作新
羅世家句麗壤接中國強大之治七百餘年作
句麗世家百濟并吞馬韓國以富強傳六七百
年作百濟世家穢貊海隅山澤間國立國最舊

靺鞨強大後稱渤海降契丹為東契丹作穢貊
靺鞨列傳駕洛稱神明之治大伽椰作十二絃
琴作駕洛大伽椰列傳毛羅南海中小國出善
馬螾珠玳瑁始通於新羅國號耽羅附於新羅
之下

述職方地負貨殖作地乘二千言

黑齒東海中蠻夷強國七道六十一州六百十
一縣作黑齒列傳

上之十四年癸丑得暑節孔巖許穆序

記言東事序終

記言卷之三十三 外篇

東事二

新羅世家上

新羅本辰韓之地宜五穀饒蚕桑之利其俗儉
番男女有別新羅出於赫居世原史曰赫居世
化生為生民之祖其生也六部長以為神立為
君號居西干國號徐羅伐以朴為姓當西漢孝
宣五鳳元年立閼英氏為妃有二龍見而閼英
生號曰二聖樂浪來侵伐是國人門不夜扃以
為有道之國乃引歸赫居世遣鄒公聘于馬韓

其國君留欲劫之瓠公曰寡君修德以治天道
順而五穀穰熟人民敬讓傍國之歸之寡君修
禮與國遣下臣來聘禮甚厚而欲劫之者何也
其國老慙言於其君乃還瓠公其明年馬韓國
君死或曰西韓前辱我使甚無道不如因其喪
伐之赫居世曰幸人之喪不仁不聽東沃沮獻
良馬曰聞南韓有聖人來獻云弁韓降

赫居世卒子南解立號次次雄立始祖廟昔脫
解本婆那國人力學家貧漁釣南解聞其賢妻
以女以為大輔任國政南解卒遺命立脫解太

子儒理讓於脫解脫解不肯立而立儒理號尼

師今

婆那在日本
東一千里

儒理立六部大人皆賜姓為貴臣曰李曰崔曰

孫曰鄭曰裴曰薛初置官十七等曰伊伐食曰

伊尺食曰匝食曰波珍食曰大阿食曰阿食

自重阿食至
四重阿食曰一吉食曰沙食曰級伐食曰大

奈麻大奈麻自重奈
麻至九重奈麻曰奈麻奈麻自重奈
麻至七重奈麻曰大

舍曰舍知曰吉士曰大烏曰小烏曰造位問鰥

寡孤獨廢疾者四方歸之百姓富樂有堯率之

歌

駕洛始祖金首露立為附庸之國於是有五伽
伽曰阿羅伽伽曰古寧伽伽曰大伽伽曰伽伽
曰小伽伽儒理卒國人皆曰先君之命也立昔
脫解
昔脫解立以瓠公為大輔脫解得闕智於始林
闕智之生有雞瑞脫解以為天祚我以胤嗣改
始林曰雞林因以為有國之號賜其姓曰金脫
解卒立儒理子婆娑
婆娑立勸農桑修城池治器械黜不勤職者國
大治有年行者不齎糧

婆娑卒祇摩立祇摩卒無子儒理子逸聖立
令郡縣大修堤坊禁民毋用金銀珠玉逸聖卒
長子阿達羅立
三年開雞立嶺明年置迎日縣又明年開竹嶺
阿食吉宣謀叛事覺奔百濟阿達羅遺書蓋婁
曰宣不還無相好也蓋婁不聽阿達羅遣兵伐
百濟阿達羅卒無子國人立脫解之孫伐休
伐休立巡行郡縣問謠俗下令毋作土木毋奪
民時代休卒太子骨正早死太子之子助賁幼
立次子之子奈解奈解卒故太子之子助賁立

遣伊飡昔子老滅甘文國為郡助賁卒母弟沾
解立自阿達羅之世與百濟相攻伐五世新羅
自儒理滅伊西之國脫解滅干尸居漆婆娑降
悉直押督比只多伐草八音汁伐沾解連克甘
文沙伐并國十一國益強百濟遣使求和倭遣
兵來侵燒殺貴臣子老後倭使者至于老之妻
請享使者飲醉而燒殺之曰所以報之也

沾解卒無子國人立味鄒闕智之七世孫也味
鄒卒助賁子儒禮立築城沙道徙沙伐州豪富
於沙道賜印觀署謁二人爵二人者鬻綿相讓

不相取儒禮聞之賢而爵之儒禮卒助賁孫基
臨立問高年賤窮之望祠太白樂浪帶方來朝
基臨卒無子國人立于老之子訖解訖解卒無
子立味鄒之從子奈勿奈勿母曰休禮味鄒之
女也奈勿立問鰥寡孤獨賜穀人三斛舉孝弟
異等百濟禿山城主以其民來附令分居六部
其國君近肖古遣使責還奈勿曰民無常懷懷
則歸之不懷則去之不患民之不懷而責寡人
乎濟使大慙奈勿卒子幼國人立實聖闕智之
後也奈勿時實聖質於句麗深怨之既立為君

欲殺訥祗釋憾於其子謀泄訥祗弒實聖而自立號摩立干

訥祗二弟卜好質於句麗未斯欣質於倭訥祗思欲還歸而無計策問軟良州干堤上堤上曰忠臣事不辭難義不辭死請行往說麗君曰賢王尚信質子五霸之所不為卜好寡君之愛弟也質於大國今十年寡君思相見日望大王之推愛也大主許之寡君德大王之高義修好不在於質子也麗王從之既還卜好堤上曰倭難諭以義偽得罪亡者可給而歸語王曰我既行

卽囚妻子使聞於倭至倭給言得罪亡狀先有百濟亡人言新羅與句麗謀伐倭入聞未斯欣堤上妻與子皆已係累以為兩人深怨於新羅乃舉兵伐之令兩人前導堤上陰遣未斯欣逃歸而身不去以聽倭倭首長怒其賣已也召堤上具五刑以待堤上終不屈乃燒殺堤上堤上妻及其二女登鷄述之嶺哭望悲號乃死國人哀之立祠以祀之命曰神母祠晉太元元年遣使入貢于晉行養老禮執饋以養賜穀帛始用牛車倭圍金城十日解歸訥祗親帥輕騎追擊

之大敗倭圍王數重忽有大霧倭以為有神助
乃解而去

地震金城城門壞其年訥祗卒長子慈悲立倭
攻歙良州命代智德智大破之慈悲卒子炤智
立初置郵定列肆通百貨百濟饑流民至者六
百戶

王之妻有外私謀殺王適有烏報事發覺誅之
立報日以正歲十五日祭烏立慎日以龍致雨
馬服勞豕鼠耗百穀每正歲各以其辰祈禳禁
百事炤智卒無子智大路立奈勿四世孫也是

為智證王

新羅世家中

智證王立建國號曰新羅始稱王立喪服制除
殉葬

定州郡縣命有司以時藏水教牛耕作舟楫于
山國降獻土物于山悉直谷東海中小國 曰
鬱陵王卒太子原宗立是為法興王

王立初置兵部令頒律令立官制定服色七等
角干大阿飡紫衣阿飡級飡緋衣牙笏青黃衣
錦冠緋冠纓組有次梁普通元年遣使通于梁

於是佛法始行羣臣皆曰浮屠其言詭異從其
法恐後悔王不聽乃下令禁屠殺駕洛國君仇
衡降駕洛亡時天下分裂始稱年號曰建元王
薨弟立宗之子多麥宗立是為真興王方七歲
母太后聽政改元開國

選童男良善學孝弟忠信以異斯夫為兵部令
治兵事遣居漭夫伐取句麗十郡作浮屠百座
講會立八關法百濟與新羅謀伐句麗王不聽
句麗德之與新羅連和百濟王明禮親帥眾攻
新羅管山軍主武力擊殺王斬佐平四人卒二

萬九千六百士卒無還者異斯夫又滅大伽倻
先是伽倻政亂樂師于勤以樂器來奔館於國
原命知法階古萬德傳伽倻十二曲于勤作十
二絃琴又作玄琴於是徒貴戚大姓六部豪傑
於國原以為小京許度僧廣興佛寺作皇龍寺
鑄鐘重三萬五千斤改元弘濟異斯夫言於王
命大阿飡居漭夫招文學作國史

三山岳得七絃琴變其制命曰玄琴有玉寶高
者作三十曲傳之續命得續命得傳之貴金貴
金傳之安長安長傳其子克宗克宗作七曲克

宗之後傳羽調平調共百八十七曲作鄉琵琶
宮調七賢調鳳凰調共二百一十二曲王幼而
立尊信浮屠立三十七年剃髮為僧號法雲妃
為尼立其子金輪是為真智王薨故太子銅輪
之子伯淨立是為真平王改元建福

王好獵伊飡后稷諫王不聽后稷死謂其子曰
葬我於田獵之途冀王之悟心後王問其塚泣
曰生而諫死而不忘君忠臣義也終王之世不
復出獵

置禮部令掌禮式調府令掌貢賦乘府令掌車

乘

大水沒民戶三萬三百六十發粟賑之

隋開皇十四年冊王為樂浪郡公新羅王唐武
德元年遣使八貢于唐帝勞問使者遣使報聘
賜璽書彩錦三百純冊封為王百濟攻西鄙拔
二城大出兵屯熊津遣使如唐乞救百濟使者
適至帝以璽書責諭令毋相侵伐百濟乃止然
相仇如故矣

王遣末利舒玄伐句麗不利舒玄子庾信率精
兵擊破之拔狼臂

貞觀六年王薨無子國人立其長女德曼是為善德王改元仁平問國內鰥寡孤獨唐冊命女主為柱國樂浪郡公新羅王王宮西玉門池有蝦蟆大集主曰蝦蟆兵像也南邊谷玉門意有兵遣兵擊之果有百濟潛師欲襲邊邑急擊盡殺之七重南大石自移遣子弟入學於唐百濟王義慈親率兵伐取獮狻四十餘城又與句麗伐取党項以絕唐路主告急於唐欲伐百濟遣伊飡春秋乞師於句麗初大野之役品釋死而其妻從而死春秋女也春秋將行誓庾信

曰六十日不還請於王伐句麗至則無出兵意迺曰二嶺之地本我地地不還兵不出春秋曰百濟無道寡君伐大國之威欲伐罪使下臣致命於下執事無意出兵劫人還地臣有死而已王怒而囚之春秋已六十日不還庾信請於王募戰士三千人將伐句麗句麗聞之厚禮春秋以歸使者至唐太宗已先有東伐之意至是帝親征句麗主發三萬衆助攻句麗百濟以新羅空國助王師襲取西鄙七城遣庾信伐百濟貴臣毗曇廉宗舉兵欲廢女主庾信還擊斬之

作瞻星臺主薨立其母弟國飯之女勝曼是為
真德王長七尺垂手過膝

主遣庾信伐百濟拔十二城斬首二萬級獲九
千人又屠九城斬首九千級獲六百人口報大
野之役也百濟歸品釋及品釋之妻之骸骨於
新羅主遣伊飡春秋如唐太宗見春秋狀貌環
偉禮接之甚厚從容問欲有言乎對曰百濟恃
強侵伐小邦數十城絕朝貢之路陛下不借天
威小邦無所措職太宗命將軍蘇定方出兵二
十萬人征百濟春秋觀太學請章服而歸用永

徽年號定百官冠服

主作太平頌織錦獻之

永徽五年主薨羣臣迎立春秋是為太宗武烈
王真智孫也

新羅世家下

句麗與百濟鞞鞞兵伐取新羅三十餘城百濟
又攻陷七城庾信擊破之攻百濟之刀比克之
顯慶五年蘇定方以水陸兵十三萬伐百濟帝
勅王為行軍總管王親帥師次南川遣太子法
敏上大等庾信率精兵五萬與唐兵直趨泗泚

百濟王義慈降百濟亡王攻取百濟二十餘城
又連戰連勝之斬首二千餘級王論功賞以庾
信拜大角干位十七等上任用百濟佐平忠常
常永等七人

定方以義慈見夸帝曰何不因伐新羅定方對
曰其君仁其臣忠不可伐也句麗與靺鞨攻新
羅述川不克攻北漢城主冬陀川力戰二十日
有大星墮於麗軍天大雷震麗人懼而去王以
冬陀川為大奈麻時百姓樂業歲大熟布匹粟
至五十石

龍朔元年王薨太子法敏立是為文武王帝遣
任雅相合諸胡兵三十五軍伐句麗帝諭王出
兵與大軍會蘇定方破麗兵於浪江進圍平壤
庾信以精兵數萬直抵平壤會有詔班師句麗
追躡之庾信擊破之斬首虜萬五千百濟公子
福信起兵迎義慈子豐西北部皆應之圍劉仁
願於熊津帝詔郎將劉仁軌發羅兵救之連克
支羅大山沙井福信退保真峴羅兵又擊破之
豐忌福信斬之乞兵於倭以拒唐仁願請益兵
得淄青兵四十萬又與庾信等二十八將軍急

擊之遇倭兵於白馬浦口庾信等四戰四捷連
燒闔艦四百倭人悉降豐兵敗奔句麗王前倭
降者數之曰我與倭修好無所失道與百濟謀
我何也我不忍殺汝歸語爾主縱遣歸國
獨任存城險糧多攻之不下又得黑齒常之別
部沙吒互為形勢旬日復二百餘城帝下詔乃
降百濟悉平王以百濟既平大赦命有司大酺
令國中男女被服皆從唐制
句麗貴臣淵淨土見國內大亂以諸從官及十
二城戶口三千五百四十來降

摠章元年帝遣李世勣伐句麗王令諸道摠管
領兵助攻句麗王次漢城兵二十萬人遣諸將
與唐兵圍平壤克之句麗王滅降句麗亡唐將
李謹行擊破句麗餘衆於瓠瀘河諸敗兵皆降
新羅王加庾信太舒發翰位角干上食邑五百
戶上殿不趨以句麗俘虜七千告祖廟遂賚死
事者帛有差

咸亨元年倭自言其國近日之所出更國號曰
日本遣使來聘

王既多取百濟城邑欲請和於熊津都督不聽

乃分遣諸將攻百濟八十餘城皆下之又發兵
踐百濟田禾遂與唐兵戰於石城斬首五千級
置所夫里州以阿飡真王為都督又戰於平壤
大敗王遣使還虜獲將士七百人以謝之
遣水軍將徹川鎮海西與唐將及契丹靺鞨兵
九戰皆克之諸敗軍溺河死者不可計數帝怒
奪王爵以劉仁軌為雞林道大總管伐新羅以
王弟在京師者仁問為王遣歸劉仁軌攻七重
城克之王遣使乞罪貢方物乃赦王復王爵詔
李謹行屯買肖以經略之

奈麻德福作新曆

令僧義相作浮石寺於太白山治宮室聚四方

珍禽怪獸

薛仁貴攻泉城將軍文訓逆擊大破之又擊破
謹行二十萬衆於買肖又與唐兵十八戰斬首
六千級沙飡施得與薛仁貴連戰數十合皆勝
之斬首虜甚多王立二十一年日無光如夜天
狗墮王薨太子政明立是為神文王遺命葬東
海石上

置醫學博士又置律令典博士

立國學遣使如唐請禮典薛聰作九經訓義時
東海出萬波息笛吹律而東海無波置州郡縣
百濟舊地熊川武珍二州泗泚發羅二郡石山
馬山孤山沙平四縣
孛星出五車

嗣聖元年王薨太子理洪立是為孝昭王薨無
嗣國人立其母弟隆基是為聖德王王立赦復
諸州郡縣一年租稅
王作官箴戒百官令羣臣各言闕失置典祀署
唐勅王改名興光避開元諱也

開元十九年下詔褒仁義之邦賜綵綾五百帛
二千五百又賜紫羅繡袍瑞文錦三百太人舒發
翰金庾信滅句麗六年卒其妻為尼太宗女也
封夫人歲給金城租一千

渤海靺鞨叛唐召兵王遣將與唐兵會伐渤海
天寒大雪山深阻院士卒多死無功而還作漏
刻置漏刻典博士改詳文司為通文博士掌詞
命

大鑄佛鍾於皇龍寺重四十九萬七千五百八
十斤賜孝子向德租三百斛命有司立石紀之

向德熊川州板積鄉人

開元二十三年帝賜以涇南句麗舊地明年王
薨太子承慶立是為孝成王四年薨太子憲英
立是為景德王

置國學諸業博士助教置貞察糾正百官又置
天文博士定九州曰尚州曰良州曰康州曰漢
州曰朔州曰溟州曰熊州曰全州曰武州小京
五郡縣四百五十

永泰元年王薨太子乾運立是為惠恭王才八
歲母太后聽政

兩日並出星隕王宮相擊如火光彗星出大雷
電震佛寺一十六所天狗隕庾信塚旋風起至
赤居世塚晦迷有哭聲王懼責已祭庾信黃霧
四塞兩土伊滄志貞作亂弒王上大等良相舉
兵誅志貞而自立是為宣德王奈勿十世孫也
立社稷修祀典貞元元年薨遺命燒柩無嗣羣
臣迎立上大等敬信奈勿十二世孫也是為元
聖王

追尊四世為王王都大飢出粟六萬六千二百
石賑之立科舉法有上讀中讀下讀通五經三

史百家者擢用有金生者隱居不出年八十其
書傳天下發七州丁壯築碧骨堤貞元十五年
王薨遺命燒柩太子早卒太子之子俊邕立是
為昭聖王

暴風臨海仁化二門壞王立一年薨太子清明
立是為哀莊王

母太后金神述之女惡同姓以父名神為申氏
作伽伽山海印寺禁立佛寺禁佛寺用金銀錦
繡牛頭州有石自起立望海寺二塔相擊西兄
城盜庫吹門戟令彥昇弒王自立是為憲德王

昭聖王之母弟也

王城大風大霧如夜唐李師道叛帝詔徵發王
遣將以甲兵五萬討之唐息縣有石自移湏江
南川二石相擊西原京雨蟲大飢追封太舒
發翰庾信為興武王寶曆二年王薨太子景徽
立是為興德王

開成元年有星孛于東太白犯月王薨無嗣從
祖弟均貞從祖弟之子悌隆爭立中原大尹金
陽立均貞侍中金明園王宮弒均貞立悌隆是
為僖康王明又弒之而自立均貞子祐徵收餘

兵與清海大使張保臯謀復讐陽亦募兵擊殺
明迎立祐徵是為神武王立四月而薨太子慶
膺立是為文聖王

大中十年王薨立其叔父誼靖是為憲安王薨
無嗣遺命立其壻膺廡是為景文王僖康王之
孫也薨太子最立是為憲康王王遊鶴城還至
海二有大霧迷路禱于海神大霧乃開號其浦
曰開雲浦有四人者異形詭服詣王前歌舞以
諷從王入京賜爵號曰虔容崔致遠初事唐知
天下亂歸國又新羅政衰入深山不返中和四

年遣使如唐賀破黃巢光啓二年王薨無嗣立
其弟晃是為定康王

王立一年薨遺命立女弟曼是為真聖王主淫
亂無紀佞倖用事政大亂弓裔叛據北原裔憲
安王庶出子也裔生屋上白氣屬天日者奏兒
五月五日生而有齒不利於國王命勿舉也
其姆竊舉之比長從浮屠尋棄去從竹州賊箕
萱不禮之又棄去從北原賊梁吉吉委仕之裔
善鬪與士同甘苦得衆心

甄萱叛據全州自稱後百濟萱父阿慈介者務

耕種起家至將軍初萱父耕田毋饁之置兒林
木下虎來乳之年十五自稱甄萱從防守為裨
將見新羅故亂遂從羣盜劫郡縣有衆五千據
武珍州自立為王

弓裔攻取漢州十餘郡遂據松岳郡自立為王
乾寧四年主傳位於太子曉憲康王之子也是
為孝恭王裔攻取沮西道及漢州三十餘邑立
國號曰摩震紀元武泰設百官明年改元聖冊
後改國號曰泰封改元水德萬歲徙都鐵原又
攻取尚州等三十餘城遣王建黔式擊破甄萱

於沙火士馬益強十六年王薨無嗣國人立大
阿飡景暉阿達羅之後也是為神德王薨太子
昇英立是為景明王裔猜忌有功者皆殺之諸
貴臣人人自危國中內叛其諸將立王建為王
國號高麗建元天授國人鼓譟從之者萬餘人
裔出走為芥壤民所殺

高麗定都松岳郡以平壤為西京

甄萱陷大良仇史王求救於高麗高麗遣兵救
之王立八年薨母弟魏膺立是為景哀王
王立三年甄萱陷王城執王數之令自殺盡取

其子女珍寶兵仗百工強辱妃嬪以亂之立傳
文聖王之後也

高麗敗甄萱於瓶山萱敗走東方州郡二十餘
城皆降高麗萱子神劔作亂囚其父於金山佛
宇自立萱奔高麗降

王立九年以國微弱不能立欲降高麗國之舊
臣或不從有王子諫曰興國亡國天也君臣死
守力盡則同死社稷禮也不可降也王曰吾不
忍以寡德之故使百姓父子兄弟僵仆暴骸骨
於原野王率羣臣百姓降高麗新羅亡新羅自

芬居世三姓相承至王傳五十六世凡九百九
十二年王子入深山倚巖為屋而居以終其身
高麗封傳樂浪王食邑八千戶歲給一千除慶
州為食邑卒謚敬順

新羅方外別國聲教所不及不列於冠帶之倫
然芬居世脫解閔智上哲相承三姓揖讓而迭
王此三代之所未有也有德之治立國千年號
為仁義之邦至亡國之世猶有遺風餘教可觀
可謂善始善終者也

駕洛

駕洛者新羅南境海上別國初無君長始祖化
生當東漢建武十八年有九落九千神明之推
其始出者立為君號曰首露姓曰金建國號曰
駕洛亦曰伽倻此所謂駕洛伽倻者也其次五
人各為五伽倻主一曰阿那伽倻今咸安郡也二曰
古寧伽倻今咸昌縣也三曰大伽倻今高靈縣也四曰碧
珍伽倻今星州牧也五曰小伽倻今固城縣也首露立七
年得阿脩陀國君之女立為妃是為皇玉夫人
亦曰普州太后姓許氏或曰南天竺國君之女
或曰西域許國君之女亦曰許黃之國誌記其

先君之命曰東方有駕洛元君得女為配浮海
而至云首露之世黎民太康四方來則之有音
汗伐與悉直谷爭地相攻伐兩國爭質於新羅
新羅以為首露神明之治召問之首露至以所
爭地屬之音汗伐而兩國之難解新羅國君發
娑命六部大人享首露諸部畏之皆使伊食主
客而獨漢祗部主客不使貴人首露以為慢禮
不恪擊殺其大人保齊駕洛有得罪三者依音
汗伐首露遣使索之音汗伐不與首露舉兵攻
之音汗伐降後新羅祗奪立伐駕洛敗於黃山

河於是國益強其地東至黃山河北至大良州
西南際海西北至居陀州百濟之界

孝靈中平六年太后許氏卒壽百五十七太后
有十男得母姓者二人云孝獻建安四年首露
卒壽百五十八葬納陵子居登立召七點山人
昂始作招賢臺傳麻品居比彌伊尸品至坐知
得傭女而嬖之女儻用事國大亂其臣元道諫
筮之得解解之繆曰解而毋朋至斯乎坐知謝
之擯女子荷山國以治強傳吹希銍智銍智祀
國母皇王夫人銍智卒鉗知立鉗知卒仇衡立

新羅法興王元年仇衡降新羅王待以客禮以
其國為金官郡封之食邑至文武王立置金官
小京駕洛凡十世四百九十一年而國亡

贊曰古初海隅生人物最後堯時始有檀君至
漢時有赤居世金蛙朱蒙闕智毛羅良高夫皆
無人道而化生建武世有六伽椰主其生亦然
上古有熊氏婦感大電生軒轅契之生簡狄吞
玄鳥墮卵后稷之生姜嫄踐巨人迹自古生民
之祖其生固然釋利貞傳曰大伽椰厥初有神
女感夷毗訶生腦室朱日腦室青裔此天地之

氣生之也。宋日者大伽倻主伊珍阿致也。青裔者駕洛始祖金首露云。此不可知也。崔致遠作利貞傳

大伽倻

大伽倻自伊珍阿致九世有異腦異腦七世至道設智滅於新羅凡十六世五百二十七年伊珍阿致之世富強五百年或傳嘉悉時有伶人于勤學秦箏作十二絃琴云

記言卷之三十三終

記言卷之二十四 外篇

東事三

高句麗世家上

高句麗始祖朱蒙姓高氏初扶餘國君得優渤女感日影而娠生朱蒙以為無人道而生棄之馬牛避不踐以為神遂收之生七年能執射號曰朱蒙朱蒙者善射之名國君有子七人忌其才能謀欲殺之朱蒙乃與烏伊摩離陝父三人亡至卒本扶餘能聚眾立國國號高句麗當漢建昭二年降松壤滅荇人北沃沮始大漢鴻嘉

二年朱蒙卒號東明聖王

子類利立用扶芬奴降鮮卑為屬國薛支言於類利曰國內尉那巖險阻地宜五穀多麋鹿可居遂徙居太子解明不肯從好勇力有黃龍國君遺太子弓太子以慢禮辱已折而棄之使者慙類利怒以為挑亂敗國之子賜劍曰以此死太子曰父命不可逃也遂之礪津原自殺類利悔之立祠原上追思不已

王莽時發句麗兵以伐胡類利不肯出兵迫之類利出塞侵遼擊殺太守田譚莽怒遣嚴尤擊之類利降封下句麗侯扶餘國君帶素責讓類利曰我先王與先君東明王義至厚而誘我信臣亡逸立國國小兵弱以小事大以弱服強禮之順也王不循此道欲長保社稷難矣類利謝曰寡人僻在海隅不聞禮義今大王有教敢不唯命王子無恤勿聞之以為失對自請見使者謝曰我先君東明王神靈受命八王諧諸父王辱我先君令之牧馬我先君見幾出國今大王不悔前讐恃強國蔑我耶請使者還報既使還扶餘發兵攻之遣王子無恤以拒之無恤縱兵

擊殺盡之天鳳五年類利卒號瑠璃明王太子
無恤立

百濟飢東北落亡八旬麗者千餘家立始祖東
明王祠

王攻扶餘有恠由者自言北溟人長九尺請從
與餘兵戰其國君馬蹶在由直前斬其王餘兵
猶力鬪圍之數重有大霧七日無恤潛師遁去
既還國深自責吊死間孤國人大悅恠由死葬
於北溟之南以時祭之

有仇都逸苟焚永為部長所為多黷貨百姓怨

之廢為廢人以穀素代之穀素作太室居之使
三人者坐之堂下三人者慙自悔卒為善人王
曰穀素賢能服人改行以為沸流部長賜姓太
室氏

用王子好童計襲取樂浪日以滅之好童重於
王太子之母忌之譖之曰好童無禮王疑之好
童曰不可自說彰母之惡遂自殺建武二十年
帝遣兵攻取樂浪地薩水以北屬漢無恤卒號
大武神王太子解憂幼國人立其弟解邑朱五
年卒號閔中王太子解憂立不仁射殺諫者恣

所欲國人叛之其臣杜魯弒之而立瑠璃孫宮
才七歲母太后聽政夔解憂於慕本原因以為
號王既長伐東沃沮取其地為邑又侵掠遼東
六縣王立六十六年與獫狁襲漢玄菟幽州刺
史馮煥玄菟太守姚光遼東太守蔡諷伐句麗
王遣王弟遂成拒之遂成出奇兵擊玄菟遼東
陷其城燒其邑獲首虜二千餘人又與鮮卑攻
遼東王以遂成領軍國事以沛者穆度婁為左
輔福章為右輔穆度婁知遂成陰有謀稱疾
九都地震王夢有豹斷虎之尾卜之曰王之族

殆有謀絕王之後遂成出獵謂左右曰王老而
我且老矣願諸君為我計之左右曰唯命有一
人諫曰王賢明國人無叛心王子不遜禍且及
矣王知王子敬順當揖讓而有位遂成不悅左
右曰妄言不殺謀泄遂成遂殺諫者右輔福章
言於王曰遂成將叛不誅亂作王不聽遂讓於
遂成王立九十四年稱太祖
遂成元年七十六殺太祖元子莫勤其弟莫德
恐禍及自縊死太祖百十九卒明臨答夫弒遂
成左輔蔡支留迎立王弟伯固年七十七伯固

避入山中不出至是立之伯固立號遂成為次
大王遂成子鄒安逃匿山中詣闕請罪封邑為
讓國君熹平元年玄菟太守耿臨攻句麗王問
計於羣臣沛者荅夫曰兵衆者宜戰兵少者宜
守我深溝高壘勿與戰漢兵遠闔千里饋糧不
能持久不過旬月其勢必歸我以精兵薄之蔑
不勝矣從其計漢兵攻之不克食盡而歸荅夫
率輕騎追擊大破之

光和二年國相荅夫死年百十三伯固卒號新
大王太子男武立外戚貴臣比於畀留左可慮

執國命國人內叛王欲誅之二人遂舉兵叛王
伐而誅之乃下令自責徵晏留任國政晏留薦
乙巴素以禮聘之拜為相巴素明政教慎賞罰
民人以安內外無事王以薦賢受上賞拜晏留
大使者

立賑貸法問鰥寡孤獨廢疾貧者自三月至七
月發粟貸民冬則收之以為恒式時當東漢之
末世天下大亂漢人來附者衆建安二年男武
卒其妻子氏秘不發喪夜私見王之弟發歧曰
王死而無子當立汝為君發歧不荅責其無禮

乃去矯遺命立發歧弟延優

延優立納前王之妻發歧奔遼東乞兵於公孫度討延優不克自刎乃死漢平州民千餘家來魏太和元年延優卒葬山上陵是為山上王太子憂位居立

吳主孫權遣使求和王斬其使傳首於魏魏幽州刺史毋丘儉合玄菟兵伐句麗王自將步騎二萬戰於沸流上敗之再戰於梁貆又敗之王有驕志以五千騎擊之大敗收餘兵奔鴨綠原儉陷丸都王出走遂屠其城初王數侵遼東有

臣得來諫王不聽嘆曰終見此地荆棘生焉曰不食死儉聞之禁軍中有犯得來塚者斬悉還其妻子虜者王奔南沃沮賴密友紐由二臣力退魏兵得復國以丸都殘破徙都平壤

魏正始九年憂位居卒號東川王王寬仁愛人及卒國人如悲親戚有自殺以殉者太子然弗立王之妻貫那艷而妬王殺之魏攻邊邑王以精兵五千戰於梁貆大破之斬首八千晉泰始六年然弗卒號中川王太子藥盧立

肅慎氏來伐邊邑王遣其弟達賈按檀盧徙其

民六百戶於扶餘南降部落七皆為附庸有二
弟逸友素勃不遜誘而殺之元康二年藥盧卒
號西川王太子相夫立猜忌達賈無罪而殺之
國人流涕又殺其弟咄固咄固子乙弗匿於民
伍販益三年燕慕容廆來伐急王出奔新城北
部小兄高奴子擊破廆衆加奴子爵大兄患慕
容氏兵強攻伐無已拜奴子北部太守以備廆
八年國大饑民相食相夫大發國人治宮室助
利諫相夫曰國相欲為百姓死乎助利與群臣
謀廢相夫閉之外室相夫自殺迎立咄固子乙

弗葬相夫於烽山號曰烽上王

乙弗立以三萬兵攻玄菟虜八千人移之平壤
大興二年慕容廆又遣兵伐之乙弗求盟乃還
咸和六年乙弗卒號羨川王太子斯由立改名
釗咸康八年還居九都其年燕王皝自將勁兵
四萬攻陷九都王出走燕發前王乙弗之塚載
其屍虜王母及妻男女五萬燒其宮室夷其城
郭而歸王獻珍寶奇物稱臣於燕燕乃還前王
之屍猶留其母為質

永和十一年燕還王母封王為樂浪公

咸安元年以王屢侵百濟其王親率師攻平壤
王力戰拒之為濟兵所射殺號故國原王太子
立夫立二年秦符堅送佛經佛像佛法始行其
年立太學教子弟遣將攻百濟北邊陷水谷將
大舉以報年飢乃止

太元元年入貢于晉太元九年丘夫卒號小獸
林無嗣毋弟伊連立

出兵四萬攻陷玄菟遼東虜獲萬餘慕容農擊
之復二郡十七年立國社修宗廟下令崇佛求
福伊連卒號故國壤太子談德立

王親帥眾四萬攻取百濟邊邑十城又擊關彌
克之等七城百濟將真武來侵王擊破之殺八
千人燕王盛自將三萬兵伐拔新城南蘇拓地
七百里徙其民五千戶

義熙九年談德卒號廣開土太子巨璉立是為
長壽王

高句麗世家下

長壽王立遣使如晉獻赭白馬晉封王為樂浪
郡公高句麗王王立十二年大有年大享群臣
燕王馮弘患魏數侵燕燕國日削遣使來附王

遣兵數萬迎燕王弘至遼東王勞之曰龍城馮君爰適野次士馬勞苦弘慙怒稱制讓之王處之平郭尋徙之北豐弘其心素慢侮勾麗其所為一如在國時無讓於主國王怒悉收其侍人從者取其太子仁為質弘怨之私遣使如宋求迎宋發兵迎之王遣將殺弘其支屬十餘人皆殺之王自將伐百濟殺其王餘慶王立七十九年薨太孫羅雲立是為文咨王魏聞土薨素委顏深衣哭於東郊謚曰康

扶餘降

王薨太子安藏王興安立薨茅安原王寶延立薨太子陽原王平成立薨太子平原王陽成立移都長安城隋開皇九年滅陳王懼治兵為拒守計隋璽書責之王已薨太子元立封元為遼東郡王賜車服是為嬰陽王王連鞞鞞兵萬餘攻遼大敗之隋主怒削王爵發水陸兵三十萬伐勾麗不利還師王亦上表謝

命太學博士李文真修國史隋召王入朝不從新羅患勾麗連年攻伐遣使乞師於隋大業七年隋主自將伐勾麗衆百十三萬號二百萬八

年大軍至遼上麗兵阻水拒守以浮梁渡兵大
 戰于東岸克之圍遼東城攻之不下將軍宋護
 兒帥江淮兵浮海入自須水遇麗兵大破之直
 至平壤為伏兵所擊破大軍遂潰護兒僅免定
 還王遣乙支文德偽降規其軍士卒皆飢色文
 德每戰每吐將軍宇文述一日七戰七克軍士
 飢疲城堅守不得拔還至漶水軍半渡麗兵擊
 其後大破之及至遼東餘眾二千七百隋主還
 慚無功九年復伐勾麗四月隋主渡遼督諸軍
 攻遼東麗兵拒戰二十餘日不克會楊玄感叛

迺引軍還十年復議伐勾麗復徵天下兵三月
 至臨渝禡軒轅斬叛者釁鼓時天下已亂召兵
 多不至麗王亦遣使謝迺罷兵徵王入朝不從
 唐武德元年王薨弟建武立是為榮留王王遣
 使入貢于唐帝以凶隋戰士多陷於勾麗隋虜
 獲麗人追括遣歸令勾麗隋戰士在國者悉還
 還者萬餘人貞觀五年唐遣使葬凶隋戰士
 勾麗葺長城自扶餘東南至海上千餘里十六
 年而成

十六年泉蓋蘇文弒王立其從弟臧是為寶藏

王帝以蓋蘇文弑其君專國政欲發契丹靺鞨
兵伐之用長孫無忌計乃止明年新羅以百濟
勾麗共伐其國乞救於唐賜璽書令戢兵蓋蘇
文不奉詔貢白金却之帝自將伐勾麗布告天
下詔新羅百濟奚契丹共擊之十九年四月大
軍皆集玄菟新城李世勣括蓋牟城張亮拔卑
沙帝渡遼拔遼東城降白巖城為巖州進攻安
市城北部釋薩延壽惠真連靺鞨兵十五萬救
安市城大戰克之延壽惠真降收靺鞨兵皆坑
之安市城力戰日六七合六十餘日終不下築

土山臨城迫之麗兵出戰奪據土山帝督諸將
攻之三日不能克帝以遼左早寒草枯士馬難
久留詔班師耀兵城下而歸城主從城上拜帝
賜縑百匹還軍渡遼暴風雪士卒多凍死
日無光三日東明王塑像泣血三日

王及蓋蘇文遣使謝獻二美女不受復議伐勾
麗明年遣牛進達李世勣伐勾麗世勣破南蘇
進達拔石城又明年遣薛萬徹伐勾麗

永徽六年遣程名振蘇定方伐勾麗

乾封元年遣李世勣龐同善契苾何力伐勾麗

又命劉仁願會新羅王伐勾麗賜羅王大將軍旌節

摠章元年薛仁貴為前鋒連戰連勝遂拔扶餘川中四十餘城皆降時彗星見於畢昴許敬宗曰勾麗滅亡之兆也

蓋蘇文死而其子男生代其父為莫離支其弟男建逐之男生奔國內城遣其子入唐為向導世勣拔大行城與新羅合兵伐破鴨綠柵圍平壤月餘王城降勾麗亡自朱蒙氏至滅二十八年世七百五年

分勾麗五部百七十六城為九都督府四十二州百縣置安東都護府於平壤留薛仁貴為都護以鎮之世勣以滅及諸王子大對盧虜獲二十餘萬人歸

二年移三萬八千三百戶於江淮之南及山南京西諸州

有圖讖曰不及九百當有八十大將滅之高氏有國將八百年勣年八十儀鳳元年封滅為朝鮮王城至遼東謀叛召還徙邛州而死勾麗之地沒於新羅

贊曰周禮幽州其山鎮曰醫巫閭其下遼東玄菟勾麗朱蒙氏邑於卒本扶餘在玄菟之城雄健桀驁撫有諸部諸傍國弱者兼之亂者滅之拓地千餘里傳三十君七百餘年可謂盛矣其俗雜肅慎鮮卑靺鞨引弓強戰以攻伐興以攻伐亡然其壤界接於禹貢冀州中國之地而實箕子之國其民質實有大國之遺風

百濟世家

沸流温祚勾麗始祖朱蒙二子也與太子類利不相能及類利立兄弟二人與烏干多黎亡至

自十二卷下

中張常在下
二十一二十三張
之問

正四州曰長嶺府領珂何二州扶餘故地為扶餘府常屯勅兵扞契丹領扶山二州鄭頡府領鄭高二州挹婁故地為定理府領定潘二州安邊府領安瓊二州卒賓故地為卒賓府領華蓋建三州拂涅故地為東平府領伊蒙沓黑比五州鐵利故地為鐵利府領廣汾蒲海義歸六州越喜故地為懷遠府領達越懷紀富羨福邪芝九州安遠府領寧郿慕常四州以郅銅涑三州為獨奏州涑州以其近涑沫江也涑沫江者古粟末水也

後唐明宗元年契丹主攻扶餘按之遂進兵圍
忽汗渤海王誣譏兵敗降契丹改渤海為東
丹冊其太子倍為人皇王主之置誣譏於臨潢
之西賜名烏魯古渤海世子光顯與其貴臣來
奔高麗賜姓名王繼附之宗籍令太氏不絕其
祭祀也

七羅

七羅南海中國七羅初無君長有高乙那良乙
那夫乙那三人化生為人能樹藝五種畜牧成
群三人者分居三都各為帥長高乙那十五世

河南沸流歸彌鄒忽温祚歸慰禮温祚有良佐
十人國號十濟沸流死并有其地改國號曰百
濟與勾麗同出扶餘以扶餘為氏立始祖東明
王祠其立國當漢鴻嘉三年與靺鞨相攻伐用
乙音為右輔治兵事築城馬首立柵瓶山樂浪
太守使告曰城不集柵不毀請一戰決之王謝
曰堅城設險封疆之固也執事恃強出兵小國
亦嚴兵以待樂浪連靺鞨襲破瓶山王遣使馬
韓定疆域北自浪江南盡熊川東至走壤西極
大海築城闢于漢山徙慰禮民人以實之遂徙

居焉立國母祠制祀壇以享天地神祇五帝之神王宮鴻鴈集日者曰當有遠人至南汝沮來立熊川柵馬韓國君責讓溫祚曰王初濟河而南無尺寸地我割百里地以與王待大王不為不厚及國完民聚不見報德反侵犯我疆域此何義也溫祚慙而毀之明年宮井溢有馬生牛一體兩頭卜之曰國以昌大并有隣國溫祚大悅與羣臣謀曰馬韓削弱百姓離心無弱攻昧霸王之大權時不可失也佯出獵襲破馬韓盡有其地惟圓山錦峴不下仍伐之二城下馬韓

亡

大旱東北諸部落飢亡八旬麗沮帶之間空無民居乞音死解婁代之解婁年九十餘有神知不老溫祚立四十六年卒子多婁立東部屹子與靺鞨大戰於馬首下斬首虜甚多賞良馬十粟五百下令國南州縣始作溉田靺鞨陷馬首燒其城多婁卒子已婁立卒子蓋婁立卒子肖古立潛師襲破新羅西鄙二城虜獲千人新羅大發兵伐之百濟懼還虜獲乞和後百濟與羅兵戰於蛙山大破之肖古卒子仇首立靺鞨圍

赤峴仇首親率勁騎擊破之仇首卒子沙伴幼
不慧國人立肖古母弟古余

置佐平六官曰內臣掌宣納曰內頭掌庫藏曰
內法掌禮儀曰衛士掌宿衛曰朝廷掌獄刑曰
兵官掌兵事又置達率思率德率扞率奈率將
德施德固德季德對德文替武替佐軍振威克
虞十六品佐平五率服紫五德服緋二督佐軍
振武克虞服青國君紫袍犬袖青錦袴素革帶
烏革履

立贓法贓禁錮官人受財及盜徵三倍

古余卒子責稽立貊人來侵伐責稽親率兵拒
之為所殺長子汾西立又為樂浪刺客所刺殺
子勿國人以仇首子比流久在民間寬仁愛人
共立之間民疾苦賜窮人無所告者殺人三石
卒汾西長子契王立卒比流子近肖古立
勾麗來侵大敗而歸近肖古帥精兵三萬攻平
壤射殺其王釗禿山民三百奈新羅初置博士
近肖古卒太子近仇首立卒子梳流立遣使如
晉有胡僧摩羅難陀至自晉佛法始行梳流卒
太子阿牟勿其弟辰斯立

大發丁壯設關防自青木嶺北距八坤城西至
 于海大獵狗原七日治宮室多聚異草木哥禽
 又大獵狗原卒於狗原枕流太子阿莘立
 遣左將真武伐勾麗戰於浪水上大敗死者八
 千人欲雪浪水之恥大舉者再而皆不利還軍
 明年又大徵發百姓怨之多奔新羅阿莘卒太
 子腆支質於倭次子訓解攝政以待太子歸少
 子磔禮殺其兄自立腆支至國人殺磔禮而立
 腆支卒子久余卒立卒于毗有立卒子餘慶立
 是為蓋鹵王

發東北部丁壯築沙口城王欲伐勾麗乞兵於
 魏魏不許王怒遂絕魏
 勾麗募浮屠覺琳偽得罪來以博奕見王說以
 治城池高宮室大園囿作石擲更先王之墓國
 內空百姓離散勾麗王親率三萬兵來伐之直
 趨王都急王以數十騎遁去為怨民所執縛麗
 王殺之子文周立遷都熊津
 耽羅貢方物耽羅或曰耽毛羅南海中小國佐
 平解仇擅權王不能制王出獵解仇令盜弒之
 太子三斤立

德率真老討解仇誅之三斤卒文周弟昆支子
牟大立是為東城王

魏遣兵伐百濟大敗百濟大飢盜賊多起流民
入新羅者六百家入勾麗者二千起臨流閣諫
者皆不報王出獵為加使人弒之子斯摩立是
為武寧王

加據加林叛王討之加出降斬之勾麗襲取加
弗圓山虜獲千餘王出擊大破之

梁冊王寧東大將軍王薨子明禮立是為聖王
遷都泗泚改國號曰南扶餘遣使如梁侯景已

滅梁景曰使者後景平使者乃還王伐新羅軍
主武力擊殺王斬佐平四人士卒死者二萬九
千六百人子昌立是為威德王

齊冊王為車騎大將軍帶方郡公百濟王薨子
惠王季明立薨子法王宣立下令嚴佛戒禁殺
生禁網罟大作興王寺王薨子武璋立穿大
池於王宮之南灌水為海王遊泗泚北浦名其
浦曰大王浦

隋大業八年發天下兵百三十萬衆伐勾麗王
遣使請為向道嚴兵境上實持兩端以觀望隋

師大敗而歸

唐武德七年百濟入貢于唐唐冊王為帶方郡公百濟王薨太子義慈立

王親率衆伐新羅取四十餘城又遣將陷大野軍亡品釋出降軍亂品釋先殺其妻自刎而死百濟取其尸而歸留兵守之又攻新羅連敗於買利

大野道隆大將殷相死士卒亡者前後八萬餘人

有衆狐入王宮鬼夜哭又有鬼入王宮大號百

濟亡忽入地掘地得龜其背有文曰百濟月滿新羅月新有巫釋之曰月滿者虧新者盈王怒殺其巫

起望海樓於王宮之南王都泉井赤泗泚水赤西海群魚死蝦蟆集樹上萬數市人相驚走有僵死者義慈淫亂佐平成忠諫義慈怒以為謗已囚之成忠不食死臨死上書言忠臣死不忘君相時占變兵革已兆有亂守上流毋令敵兵先得險阨遂死獄中大野之敗軍主品釋之妻新羅國君之女也既積怒於濟日以滅濟為謀

親乞兵於唐矣

顯慶五年唐遣蘇定方率水陸兵十三萬人伐百濟勅新羅王為行軍總管以助兵威新羅以太子法敏上大等庾信率精兵五萬與唐兵會於德物

佐平興首忤於王既斥去王急遣人問於興首曰事急矣為之奈何興首曰拒塞白馬炭峴以待食盡擊之可破也左右皆曰興首自以非罪久入牢獄常怏怏怨望其言不可信用也大兵已過白馬炭峴直趨王都將軍階伯受命先殺

其妻子率死士出戰羅兵四戰四却階伯力戰死之義慈歎曰悔不用成忠之言與太子孝夜遁去保熊津詣定方降諸城皆下百濟亡百濟自溫祚至義慈三十世凡六百七十八年新羅王與唐將置酒大享將士坐義慈於堂下使之行酒百濟群臣皆欲死泣下定方以義慈及太子孝諸王子貴臣將士八十八人百姓萬二千八百七人歸

置熊津馬韓東明金連德安五都督府使郎將劉仁願留鎮泗泚城

義慈死於唐詔葬孫皓陳叔寶塚傍

唐以王子隆為熊津都督歸國與新羅釋憾新羅王與扶餘隆盟于熊津其誓曰各除宿憾結好和親有背盟侵犯者神明監之裡祀磨滅既歆血埋牲幣歲其書於祖廟後唐加隆帶方郡王令返國安輯餘衆隆畏新羅不敢歸寄治勾麗死百濟遂絕

贊曰百濟自溫祚以強戰立國專務富國強兵雖享國長久傳六七百年然特強暴之國世無遺風善俗國君以強戰殺死者四君亦可為有

國者之戒

獺貊

獺貊本朝鮮古地南與辰韓接北與高勾麗沃沮接東極大海西至樂浪

漢孝武元朔五年獺君南閭叛朝鮮率二十八萬人詣遼東降以其地為滄海郡數年罷建武間封其渠帥為縣侯皆歲時朝貢

其言語法俗與高勾麗同人性愚慤少嗜欲有廉恥之風同姓不相娶不寶珠玉邑落有相犯者責出生口牛馬有出軍調賦如中國漢建光

元年幽州刺史馮煥玄菟太守姚光遼東太守
蔡諷將兵擊殺獫狁渠帥盡獲其兵仗財物
周時已有狁狁之居山深阻阨為不爭之地狁
人不知興亡易世亦不知狁立國於何世絕種
於何世史記不言

至唐時靺鞨置慶塩穆賀四州於獫狁古地
地志江陵古獫國壽春古狁國江陵有獫城

靺鞨

靺鞨本粟末靺鞨高句麗別種有野勃三世孫
乞乞仲象與其徒渡遼河保太白山東仲象死

子祚榮嗣驍勇善騎射聚高麗亡眾建國號曰
震遣使交突厥地方五千里戶十餘萬勝兵數
萬盡得扶餘沃沮弁韓朝鮮之地開元元年封
渤海郡王始去靺鞨稱渤海

黑水州
長史

太祚榮卒子武藝嗣八寇登州唐出師與新羅
共擊渤海南鄙天寒大雪山深阻阨士卒多死
無功而還寶應元年武藝死子欽茂嗣徙上京
直舊都三百里忽汗河之東唐冊欽茂為渤海
郡王

仁秀祚榮弟也能攻伐北海諸部遂為強大之
國唐詔加司空渤海王自祚榮以來數遣諸生
詣太學得古今法制其禮樂官府之制皆從唐
古百濟勾麗舊地為新羅靺鞨所分有五京十
五州六十二縣

以肅慎故地為上京曰龍泉府領龍湖渤三州
其南中京曰顯德府領盧顯鐵湯榮興六州穢
貊故地為東京曰龍原府亦曰柵城領慶蓋穆
賀四州沃沮故地為南京曰南海府領沃晴椒
三州勾麗故地為西京亦曰鴨綠府領神桓豐

二十二文
上十二文
下

有高厚者始通新羅時客星見新羅國君說厚
曰星主賜國號曰耽羅後服事百濟百濟既滅
有佐平徒冬音律降新羅高麗神聖王二十年
其國之太子末老者入朝毅宗時國除置郡縣
其性癡其俗儉嗇好鬼神多壽考知禮讓人死
則葬之田間不事浮屠出善馬瑣珠玳瑁螺貝
富橘柚黃柑山高海惡漁釣射獵不用網罟

記言卷之三十四終

記言卷之三十五 外篇

東事四

地乘

初作誌林改地乘書大抵
出地員貨殖重禮義善俗

朝鮮九域之地在燕齊外東南西際大海北連
靺鞨句麗末世失玄菟遼東地七百里以涇水
為界南北三千里東西千里風氣之殊聲音服
食嗜欲與中國異俗蓋方外別國上古自檀君
歷箕子氏三韓四郡二府及三國之世弁韓馬
韓為百濟所并真番赫居世所起而臨屯夷貊
之地悉并於新羅樂浪并於句麗玄菟并於遼

東高麗并有三韓地分為關內中原河南江南
嶺南嶺東山南海陽朔方涇西十道後改揚廣
慶尚全羅交州西海東界北界我 太宗十三
年定京圻慶尚全羅忠清江原咸吉平安黃海
八道州郡縣因革不同山川界別邑里區分百
里不同俗千里不同謠南方多鳥北方多獸風
氣使然也山峽之俗樸駭機利之民僇急習性
然也東方偏薄之氣噪擾無常心大體皆然
王城圻內之地本馬韓之域東北古貊西盡大
海南陽出磬海濱瀉鹵宜種稻貊西菽粟居三

王城立后手實在百濟為南平壤麗時為南京
王者之所更居五民之所聚其俗織畜善女工
技巧衣履冠帶四方輻湊蠻戎賓服國制重儒
術詩書教士有禮樂之風開京士女素服尚聲
律古國之風也

太祖定都漢陽徙豪傑大族其不從而禁者業
工商有世工世商駟僮互市易貨古俗事浮屠
仁柔惡殺烏江西仰碧有麗王祠德津新羅北
瀆載中祀三角曰華山祭中嶽

仁祖十四年南漢立溫祚祠

須西朝鮮古地其星箕尾其次析木獺貉句麗
玄菟皆屬焉西濱大海其北間延虞芮連鞞鞞
其穀峽中大秬細秬其利絲麻蓼漆銅鐵皮革
海濱食稻鬻魚鹽龍灣中國之途物貨之所流
平壤檀君之國至周箕子所封也箕子之教重
禮俗敬鬼神器用俎豆婦人貞信不淫黎民樂
業句麗尚騎射俗變勁悍好氣力習用弓矢刀
矛平壤有檀君東明祠有箕子祠載中祀兔山
有箕子塚江東有檀君塚沮江國之西瀆載中
祀寧邊優渚水上迦葉原北扶餘解夫妻之地

成川古沸流之國亦曰東扶餘

見檀君世家

西海古朝鮮南境今圻外奮武之地東連貊地
西際大海其利絲麻鹽鐵海錯其種稻二菽粟
五莠 世宗時海州出秬黍一粒一分九寸為
黃鍾之長三分損益成十二律麗時太師崔冲
教允齋弟子曰樂聖大中誠明敬業造道率性
進德大和待聘益州南池長淵沙汀長山長山
國之材木之所出其嶼白翎大青小青儒州阿
斯達祀桓因氏神市檀君有唐莊京麗史檀君
氏之國都

中原河南馬韓之地為百濟溫祚所并西濱大海東有嶺阨之阻土沃五種無不宜其利海錯林漆棗柿木綿苧布銅鐵太原出琉黃西州蘓秦出竹箭風俗儉嗇多富人峽俗火耕種粟其民朴略多質上黨出豪俊熊州公州舊俗男第笛女歌鼓百濟遺風富強之餘也大體尚強悍善鬪河南慰禮溫祚古都有溫祚祠溫祚三世至文周自南平壤徙都熊州至明禮立又徙於泗泚改國號曰南扶餘有熊津國之南瀆載中祀蘇秦今秦安郡西其嶼上山北波其外田橫島

江南海陽江南今全州海陽今光州本馬韓之地西南際海有鹽鐵海錯橘柚椀檉竹箭之利蛇俗不力田作業漁採無積聚江南出楮漆梅榴莞苧蕉薑穰荷鬱金金馬尚厖朴古國之風也金堤五渠瀆田九千八百蓀澤之地五種無不宜全州江海之都會物貨之途商賈之所尚儉利民不推朴帶方輕悍尚騎射清渠今龍潭縣也以東朴野少文蓄茅橡昇羅昇平羅州風俗尚富麗好任俠奇氣潭州潭陽府稱多才俊龍安古俗以春秋每歲行鄉飲酒禮其誓曰不孝者黜不友者黜不信者

黜非國政者黜毀長吏者黜勉德業規過失恤
患難成禮俗同歸于厚皆再拜序齒序飲大體
金馬以南尚巫覡倡優淫技百戲群山在海中
方六十里有澳卞山宮室舟車材木之所出羅
州有南海神祠小祀帶方南原有南嶽祠尚書
大傳曰天子祭名山大川五嶽視三公四瀆視
諸侯其餘視伯子男謂其牲幣籩豆爵獻之數
也諸侯祭名山大川之在其地者記三王之祭
川也皆先河而後海故晉人將有事於河必先
有事於惡池齊人將有事於泰山必先有事於

配林先告從祀所以尊大神也祭山川海嶽最
尊今四瀆中祀而海嶽小祀蓋失之禮也毛羅
南海中國幅員四百里其種宜麥宜黍秫土瘠
民貧其民癡騃其俗儉嗇女三男二多壽考良
馬出焉有柑橘玳瑁蠙珠旄檀新羅時有高厚
者來朝賜國號曰耽羅至高麗初置濟州

大嶺之南古辰韓之地在獺貊南新羅立國千
年開井田建國學修祀典薛聰作九經口訣風
俗淳厚知禮讓稱君子之國東南際海西北阻
山土沃五種無不宜其利魚鹽銅鐵銀石楮漆

竹箭梅橘石榴萇山通日本賈蠻夷百貨
樂浪古國之餘沃壤倍收多富人尚儉素物衆
而饒列肆互市與沮西平壤稱東西京晉陽尚
侈富京山好女工寧海善絲桐皆富樂之餘也
往往有賢人之化慕仁義安善俗重為邪近峽
地瘠力田節用儲積種食海陬風俗麤戾鮮耻
尚巫覡咀呪之事有北嶽松孽水穴潮泉合浦
月影九千七億二萬八千尺有奇樂浪有赫居
世婆蘇廟其嶼鹽田絕影出善馬其外馬島七
百里

交州

淮陽府

東界古獫狁之地自沃沮至句麗南

境沙海千里六西貊多山土瘠其種菽麥大秬
小秬平原種稻蓄積海濱鬻魚鹽多大澤食螺
蛤海岸多竹箭峽中絲麻林漆蓼歸群藥紫擅
貊俗癡騃少嗜欲尚廉耻同姓不相娶旌善稱
孝弟鄉滇州獫國壽春貊國襄陽海上有東海
神祠小祀平原雉嶽有東嶽祠東州楓泉原弓
裔所據廣野三百里四塞多阻有濁川蔚玆東
海中鬱陵于山

朔方沃沮之地或曰置溝婁在盖馬東濱於淳

海北自挹婁南至獺貊千餘里其俗質樸強悍嗜利尚弓馬其利魚鹽絲麻皮革銀石琉黃北方多善馬沃沮有三種曰東沃沮曰北沃沮曰南沃沮

挹婁在不咸山北古肅慎氏之地也土沃善田種尚勇力地寒穴居弓長五尺楛矢石鏃八寸與沃沮同俗在靺鞨之域朔方咸關迤北麗時為東女真所據尹瓘吳延寵伐逐之後和州迤北叛八于元柳仁雨擊平之復和登定長預高文宜八州又後沒于元

太祖定北邊以豆滿江為界置孔鏡吉端青洪咸七州

記言卷之三十五終

